

# LE OLOMATAMATA

FAASILASILAINA LE MALO O IEOVA



SU'ESU'EGA

**IULAI 27–AOKUSO 2**

**Keriso**  
—Le Mana o le Atua

ITULAU E 3 • PESE: 14, 109

**AOKUSO 3-9**

**Sa Alofa o Ia i  
Tagata**

ITULAU E 8 • PESE: 84, 99

**AOKUSO 10-16**

**E Mafai Ona Tumau  
Io Tatou Mamā**

ITULAU E 13 • PESE: 83, 57

**AOKUSO 17-23**

**Ola e Ōgatusa ma  
le Tatalo Faaa'oa'ō**  
—Vaega I

ITULAU E 20 • PESE: 138 O Ieova  
o Lou Suafa Lea (pese fou), 89

**AOKUSO 24-30**

**Ola e Ōgatusa ma  
le Tatalo Faaa'oa'ō**  
—Vaega II

ITULAU E 25 • PESE: 22, 68





## PANAMA

**PITO I LUMA:** O loo faaaogā e Molimau faamaoni vaa e oo atu ai i tagata e nonofo i motu o Bocas del Toro i le itu i mātū i sisifo o le talafatai o Panama. E aofia ai le avatu o se molimau i le gagana Ngabere

FAITAU AOFA'I O TAGATA

**3,931,000**

TAGATA TALA'I

**16,217**

PAEONIA SAUATOA

**2,534**

I Panama e 309 faapotopotoga o loo iai, ae silia i le 180 paeonia faapito. E pe ā ma le 1,100 tagata tala'i o loo auauna i faapotopotoga e 35 ma vaega e 15 o loo faaaogāina le gagana Ngabere. E toetoe 600 tagata tala'i o loo auauna i faapotopotoga e 16 ma vaega e 6 o loo faaaogāina le gagana faitaga a Panama

## SU'ESU'EGA

- **Keriso—Le Mana o le Atua**
- **Sa Alofa o Ia i Tagata**

O nei mataupu e faatatau i vavega a Iesu ua a'oa'oina ai i tatou i lesona o le limafoa'i ma le fesoasoani i isi, ma ua faaalia mai ai nisi vala mata'ina o uiga o Iesu. O loo taula'i atu fo'i nei mataupu i se taimi o i luma o le a faataunuaina ai na vavega i le lalolagi aoao.

- **E Mafai Ona Tumau lo Tatou Mamā**

O se lu'i le taumafai e tausisi i le tulaga mamā i lenei lalolagi. O lenei mataupu o le a faailoa mai ai le auala e fesoasoani ai la tatou faiā ma leova, o fautuaga i lana Afioga, ma le fesoasoani a Kerisiano ta'umatua ina ia tatou teena ai mafau-fauga lē mamā ma tausisi ai i tapulaa mauululuga a leova.

- **Ola e Ōgatusa ma le Tatalo Faaa'oa'o—Vaega I**
- **Ola e Ōgatusa ma le Tatalo Faaa'oa'o—Vaega II**

E lē taulotoina e Kerisiano lenei tatalo faaa'oa'o i aso ta'itasi, peita'i o talosaga o loo iai i lenā tatalo e iai sona uiga mo i tatou uma. Ua faailoa mai i nei mataupu auala e tatou te ola ai e ōgatusa ma na talosaga.

## O LOO IAI FO'I I LENEI LOMIGA

18 “Afai e Mafaia e Kingsley, Ou te Mafaia Fo'i!”

30 “E Tatau Ona Outou Tumau”

32 Pe E te Manatua?





# Keriso Le Mana o le Atua

*'Ua aveā Keriso ma faaaliga o le mana o le Atua.'*—1 KORI. 1:24.

NA FAAILOA mai e Ieova lona mana i auala mata'ina e ala mai iā Iesu Keriso. A o iai Iesu i le lalolagi, sa ia faia le tele o vavega, ma e tatou te faitau i nisi o vavega i le Tusi Paia, lea e faamalosia ai lo tatou faatuatua. (Mata. 9:35; Luka 9:11) Na faaaliga mai e Iesu le mana o le Atua. O le māfuaaga lea na faapea mai ai Paulo: 'Ua aveā Keriso ma faaaliga o le mana o le Atua.' (1 Kori. 1:24) Ae o le ā le aafiaga o vavega a Iesu i o tatou olaga?

<sup>2</sup> Na faapea mai Peteru sa faia e Iesu vavega po o "mea ofofofia." (Galu. 2:22) O galuega mamana na faia e Iesu i le lalolagi ua fai ma faataga o faamanuiaga o le a aumaia i lana pulega. Ua faaāta mai ai vavega o le a faia e Iesu i le lalolagi fou a le Atua. O ana vavega fo'i ua tatou malamalama ai i ona uiga ma uiga o lona Tamā. O lea, se'i o tatou iloiloaina nisi o vavega a Iesu, ma vaai pe e faapefea ona aafia ai o tatou olaga i le taimi lenei ma le lumana'i.

1. Aiseā na faapea mai ai Paulo 'ua aveā Keriso ma mana o le Atua'?
2. O le ā e tatou te a'oa'oina mai i vavega a Iesu?

## PE E MAFAI ONA E FAAMATALA?

---

O le ā na faaaliga mai e Iesu ina ua ia liua le vai e aveā ma uaina i le 'aiga o se faaiipoipoga?

---

O le ā na uuna'ia Iesu e faia le vavega o loo faamauiina i le Mataio 14:14-21?

---

O le ā na faailoa mai e Iesu ina ua ia faato'afilemuina le matagi?

## SE VAVEGA UA A'OA'O MAI AI LE LIMAFOA'I

<sup>3</sup> I le 'aiga o se faaipoi-poga na faia i Kana i Kalilaia, na faia ai le ulua'i vavega a Iesu. Atonu na to'atele atu le 'auvalaaulia na auai nai lo o ē na faatalitalia. Po o le ā lava le tulaga, ae na uma le uaina. Sa aofia ai Maria le tinā o Iesu i le 'auvalaaulia. A o faagasolo tausaga, e lē taumatea sa ia tomānatu i valoaga e faatatau i lana tama, lea o le a ta'ua o le "Alo o le Silisili Ese." (Luka 1:30-32; 2:52) Pe sa talitonu Maria o loo iā Iesu le mana e faia ai se vavega? O le mea na tupu i Kana, na faaalua ai le alolofa o Maria ma Iesu i le ulugalii fou ina ne'i faalumaina i la'ua. O lea na ia liua ai le pe ā ma le 100 kalone vai (380 L) e avea ma "uaina lelei." (**Faitau le Ioane 2:3, 6-11.**) Pe sa mana'omia ona faia e Iesu lenā vavega? E leai. Ae sa ia manatu mamafa i tagata ma faaa'oa'o i lona Tamā i le lagi i le faaalua o le limafoa'i.

<sup>4</sup> Na faavavega ona saunia e Iesu se uaina telē mo se vaega o tagata e to'atele. O le ā e tatou te a'oa'o ina mai i lenei vavega? O le lotomalie o Iesu e faatino lenā vavega mata'ina, ua faamautinoa mai ai e tāua iā Iesu ma lona Tamā faalogona o tagata. E lē limamau Iesu ma lona Tamā. O lea, se'i faaāta i o tatou mafau-fau le auala o le a faaaogā ai e Ieova lona mana, e foa'i mai ai le tele o mea'ai "mo tagata uma" i le lalolagi aoao.—**Faitau le Isaia 25:6.**

<sup>5</sup> Se'i mafau-fau i le taimi o le a faama-

3. (a) Faamatala tulaga na māfua ai ona faia le ulua'i vavega a Iesu. (e) Na faapefea ona faaalua e Iesu le limafoa'i i Kana?

4, 5. (a) O le ā le lesona e tatou te a'oa'o ina mai i le ulua'i vavega a Iesu? (e) O le ā ua tatou a'oa'o ina mai i le vavega i Kana e faatatau i le lumana'i?

lie ai mana'oga o tagata uma, e pei o le mauaina o mea'ai ma fale. E tatou te matuā olioli pe a mafau-fau i le tele o mea lelei o le a foa'i mai e Ieova mo i tatou i le lalolagi Parataiso.

<sup>6</sup> I le taimi na faaosooso ai e le Tiapolo Iesu e liua maa e avea ma falaoa, na teena e Keriso le faaaogāina o lona mana e faamalie ai ona lava mana'oga. (Mata. 4:2-4) Peita'i, na faaaogā e Iesu lona mana e faamalie ai mana'oga o isi. E faapefea ona tatou faaa'oa'o i lenā uiga lē manatu faapito o Iesu? Ua ia faalaeiauina auuina a le Atua ina ia "foa'i atu pea." (Luka 6:38) Pe e mafai ona tatou faaalua lenā uiga e ala i le valaaulia o isi i o tatou aiga mo se taumafataga ma talatalanoa ai faaleagaga? Pe e mafai ona faaavanoa lo tatou taimi pe a mae'a le sauniga e fesoasoani ai i isi, e pei o le faalogologo i se uso o loo faata'ita'i lana lauga? E faapefea ona tatou fesoasoani i se tagata tala'i o loo mana'omia le fesoasoani i le faiva? E tatou te

6. Na faapefea ona faaaogā e Iesu lona mana, ma e faapefea ona tatou faaa'oa'o iā te ia?

Pe a faaavanoa atu o tatou taimi, e faailoa atu ai o loo tatou faaa'oa'o i le limafoa'i o Iesu (Taga'i i le palakalafa e 6)



faaa'oa'ō iā Iesu pe a tatou limafoa'i i i isi i meafaitino ma le itu faaleagaga.

### 'AAI MA MAOONA'

<sup>7</sup> O le mativa e lē o se faafitauli fou. Na faailoa atu e Ieova i tagata Isaraelu o le a iai pea tagata matitiva i le laueleele. (Teu. 15:11) I senituri mulimuli ane, na fetalai Iesu: 'E tou te faatasi pea ma tagata matitiva.' (Mata. 26:11) Po o le uiga o le fetalaiga a Iesu o le a iai pea tagata matitiva i le lalolagi? E leai. O le uiga o lana faamatalaga, o le umi ona iai o lenei faiga o mea faapi'opi'o, o le umi fo'i lenā ona iai o tagata matitiva. O lea, e faamāfanafanaina i tatou i le iloaina o vavega na faia e Iesu, ua avea ma faataga o mea lelei o le a faia pe a pule le Malo, lea o le a fau ma soloi meataumafa ma faamalieleina ai.

<sup>8</sup> Na faapea mai le faisalamo e faatatau iā Ieova: "Ua e faamafola lou aao ma faamaliele le mana'ō o mea ola uma lava." (Sala. 145:16) A o iai Iesu i le lalolagi, sa ia faaa'oa'ō atoatoa i lona Tamā ma faamaliele mana'ōga o isi. E na te le'i faia vavega e tau ina ia faaalua ai lona mana. Peita'i, na ia manatu mamafa i tagata. Se'i o tatou iloiloaina le **Mataio 14:14-21. (Faitau.)** Na savavali se motu o tagata mai i le aai e mulimuli iā Iesu. (Mata. 14:13) E oo ane i le afiafi, ua fia 'aai le 'ausoo ma ua popole fo'i i le vaivai ma le fia 'aai o tagata. O lea, na latou talosaga atu ai iā Iesu ina ia auina atu le motu o tagata e faatau a latou lava mea'ai. O le ā na faia e Iesu?

7. O le ā le tulaga o le a iai pea i lenei faiga o mea?  
8, 9. (a) Aiseā na fafaga ai e Iesu le faitau afe o tagata? (e) O ā ni ou faalogona e faatatau i lenā vavega?

<sup>9</sup> Na fafaga e Iesu le pe ā ma le 5,000 tamāloloa, faapea fafine ma tamaiti i falaoa e lima ma i'a e lua. Aiseā na faia e Iesu lenei vavega? Sa ia alofa moni i tagata ma manatu mamafa iā i latou. Na saunia fo'i e Iesu le tele o mea'ai mo le motu o tagata, auā na latou 'aai ma ma'oonā.' O nei mea'ai na latou maua ai le malosi e toe fo'i ai mo le malaga umi i o latou aiga. (Luka 9:10-17) Sa ma'oonā tagata uma ma na tutumu ato e 12 i mea'ai na totoe.

<sup>10</sup> E lē o faamalieleina mana'ōga o le faitau selau miliona o tagata ona o pulega faapi'opi'o a tagata. E oo lava i nisi o uso, e lē lava a latou mea'ai. Peita'i, ua lata mai le taimi o le a olioli ai tagata usiustaita'i i se lalolagi o le a lē toe iai ni faiga pi'opi'o ma le mativa. Pe afai e iai sou mana, po o le a e faamalieleina mana'ōga o tagata? E iai i le Atua e ou le malosi uma lava le mana ma le faanaunauga e faamaliele ai mana'ōga o tagata, ma ua lata mai le taimi e faataunuu ai lenā mea.—**Faitau le Salamo 72:16.**

<sup>11</sup> A o iai Iesu i le lalolagi, sa ia faia vavega i se vaipanoa la'itiiti mo le tolu ma le 'afa tausaga. (Mata. 15:24) Ae i le avea ai o ia ma Tupu, o le a ia fesoasoani i tagata i le lalolagi aoao a o faagasolo lana Pulega i le Afe Tausaga. (Sala. 72:8) O vavega na faia e Iesu ua faamautinoa mai ai iā i tatou lona tomai ma lona faanaunauga e faaogā lona mana mo lo tatou lelei. E ui e lē mafai ona tatou faia ni vavega, ae e mafai ona tatou faaua'i mai tagata i le Afioga a le Atua. Ua faamautinoa

10. O le ā o le a tupu i le mativa i le lumana'i?

11. Aiseā e tatou te mautinoa ai ua toe o se aga ona faaogā lea e Keriso lona mana i le lalolagi aoao, ma o le ā ua tatou naunau e fai?

mai i valoaga a le Tusi Paia mea mata'ina o le a tutupu i le lumana'i. Talu ai o i tatou o Molimau tuuina atu a Ieova ua malamalama i le lumana'i, pe e lē o lo tatou tiute tauave ea le faailoa atu i isi o na folafolaga? (Roma 1:14, 15) O le manatunatu i mea ua toe o se aga ona faia lea e Keriso, o le a tatou naunau ai e ta'u atu i isi na mea.—Sala. 45:1; 49:3.

### PULEA MALOSIAGA FAALENATURA

<sup>12</sup> I le taimi na foafoaina ai e le Atua le lalolagi ma mea uma, sa avea Iesu ma ana "tufuga potu." (Faata. 8:22, 30, 31; Kolo. 1:15-17) E malamalama lelei Iesu i le si'osi'omaga o le lalolagi. E na te silafia lelei fo'i le auala e faaogā ma faatonutonu ai puna'oa faalenatura o le lalolagi.

<sup>13</sup> A o iai Iesu i le lalolagi, sa ia faailoa mai o ia o le "mana o le Atua" e ala i le puleaina o malosiaga faalenatura. O se faaa'oa'oga, se'i mafaufau i le auala na faatonutonu ai e Iesu se matagi. (**Faitau le Mareko 4:37-39.**) Ua faamatala mai e se faitofā o le Tusi Paia, o le upu Eleni mo le "matagi" i le Mareko 4:37 e faamatala ai se matagi malosi po o se afā. E faasino atu i se matagi e masani ona faauli ai le lagi, e malolosi ai savili, o faititili ma mamafa ai timuga. Pe a mae'a atu lenā mala, e faaleagaina ai le tele o mea.

<sup>14</sup> Se'i mafaufau i le vaaiga lenei, o loo taia pea e peau o le sami le vaa ma ua sao atu le vai i totonu. E ui i le malosi o le matagi ma le felafoa'iina o le vaa, ae o loo tofā pea Iesu, ua matuā vaivai lava. Peita'i, ua fefefe le 'ausoo. Ua latou fafagu iā

**12.** Aiseā e tatou te mautinoa ai e malamalama lelei Iesu i le si'osi'omaga o le lalolagi?

**13, 14.** Aumai se faaa'oa'oga o le auala na faatonutonu ai e Iesu malosiaga faalenatura.

Iesu ma faapea atu: "O le a matou feoti!" (Mata. 8:25) Ae na faapefea ona tali atu Iesu? Na ia nofo a'e i luga, ma faapea atu i le sami: "Ia fifilemu, ma ia malū!" (Mare. 4:39) Na taofia le matagi ma ua matuā "malū" lava. Ma'eu se faaaliga o le mana o Iesu!

<sup>15</sup> O Ieova le puna o le mana o Keriso, o lea ua tatou iloa ai e mafai ona puleaina e le Atua Silisili Ese malosiaga faalenatura. Se'i mafaufau i nisi o faaa'oa'oga. A o le'i tupu le Lolo, na fetalai Ieova: "E toe fitu aso ona ou faatotōina ifo lea o le timu i le lalolagi, mo ao e fā sefulu ma pō e fā sefulu." (Kene. 7:4) I se tulaga talitutusa, i le Esoto 14:21 e tatou te faitau ai "ona faapogaia lea e Ieova le sami e alu i tua e ala i le agi malosi mai o le matagi mai i sasa'e." Ua tatou faitau i le Iona 1:4: "Ua faaoo e Ieova le matagi tele i le sami ma ua matuā sousou ai le sami; ma ua toetoe lava ina a malepe ai le vaa." E faalaeiau i tatou i le iloina e mafai e Ieova ona puleaina malosiaga faalenatura i le lalolagi fou.

<sup>16</sup> E faamāfanafanaina i tatou i le iloina e iai iā Ieova ma Iesu le mana e pulea ai malosiaga faalenatura. A o faagasolo le Pulega a Keriso i le Afe Tausaga, o le a saogalemu tagata uma e nonofo i le lalolagi. E leai se tasi o le a faamanu'alia pe faaumatia i mala faalenatura e pei o afā, galulolo, mauga mū po o mafui'e. O le a tatou lē fefefe i ni mala auā 'o le a iai i tagata le fale'ie o le Atua.' (Faaa. 21:3, 4) E tatou te mautinoa o le a tuuina atu e

**15.** Ua faapefea ona faailoa mai e le Atua Silisili Ese e mafai ona ia puleaina malosiaga faalenatura?

**16.** Aiseā e faamāfanafanaina ai i tatou i le iloa e iai iā Ieova ma Iesu le mana e pulea ai malosiaga faalenatura?



Aiseā e mata'ina ai le  
auala na faaaogā ai  
e Iesu lona mana?  
(Taga'i i le palakalafa e 13, 14)



Ieova iā Keriso le mana e pulea ai mea o le natura a o faagasolo le Pulega i le Afe Tausaga.

### IA FAAA'OA'O NEI I LE ATUA MA KERISO

<sup>17</sup> E lē mafai ona tatou taofia mala faalenatura. E na o Ieova ma Iesu e mafai ona faia lenā mea. Peita'i, e iai se mea e mafai ona tatou faia. E mafai ona tatou faatatauina le **Faataoto 3:27. (Faitau.)** Pe a mafatia o tatou uso, e mafai ona tatou fesoasoani i o latou mana'oga faaletino, le itu taufaalogona, ma le faaleagaga. (Faata. 17:17) O se faaa'oa'oga, e mafai ona tatou fesoasoani iā i latou pe a mǎe'a mala faalenatura. Na faapea mai se tuafafine ua oti lana tane na faaleagaina lona fale i se afā: "Ou te matuā lotofaafetai i le faalapotopotoga a Ieova, e lē gata i le itu

**17.** O le ā se tasi o auala e tatou te faaa'oa'o ai i le Atua ma Keriso i aso nei?

faaletino ae faapea le fesoasoani faaleagaga." Na pei ua lei se faamoemoe o se tuafafine nofofua ina ua faaleagaina lona fale i le matagi. Na ia faapea mai ina ua mǎe'a ona fesoasoani uso e faaleleia lona fale: "Ua lē mafai e upu ona faamatala o'u faalogona." Na ia toe faapoopo mai: "Faafetai lava Ieova!" E tatou te lotofaafetai i le manatu mamafa o uso ma tuafāfine i mana'oga o isi. Ae e sili atu i lenā, o le manatu mamafa o Ieova ma Iesu Keriso iā i tatou.

<sup>18</sup> A o faagasolo le faiva a Iesu, na ia faamaonia o ia o le "mana o le Atua." Ae e na te le'i faaaogāina lona mana e faafo ai isi pe ina ia mauaina ai fo'i e ia lava aogā. Peita'i, na faaaogā e Iesu lona mana e fai ai vavega ona o lona alofa moni i tagata. O le vala lenā o le a iloiloina i le ma-taupu o loo sosoo mai.

**18.** Aiseā e mata'ina ai le uuna'iga na faia ai e Iesu vavega?



## Sa Alofa o Ia i Tagata

*“Sa ou matuā fiafia i le fanau a tagata.”—FAATA. 8:31.*

### PE E MAFAI ONA E FAAMATALA?

O le ā e faamaonia ai le loloto o le alofa o Iesu i tagata?

E faapefea i vavega a Iesu ona aumaia ai iā i tatou se faamautinoaga i le lumana’i?

O le ā se vavega e te tulimata-’ia e faia e Iesu?

O LE Alo ulumatua o le Atua, o le faaa’oa’oga sili lea o le atamai o Ieova, ma o ia o le “tufuga potō” a le Tamā. Se’i mafaufau i le fiafia ma le faamalieina o Iesu a o “saunia le lagi” e lona Tamā ma ‘faia faavae o le lalolagi.’ Peita’i, mai i mea uma na foafoaina e le Tamā, “sa matuā fiafia [Iesu] i le fanau a tagata.” (Faata. 8:22-31) Sa alofa Iesu i le fanau a tagata mai lava i le amataga.

<sup>2</sup> Mulimuli ane, na faamaonia le alofa ma le faamaoni o Iesu i lona Tamā, faapea lona alofa loloto mo tagata, ina ua ia lotomalie e tuua le lagi ae afio mai i le lalolagi e avea ma tagata. Sa faia e Iesu lenā gaoioiga e ofo atu ai lona ola e avea ma “togiola e sui a’i tagata e to’atele.” (Mata. 20:28; Fili. 2:5-8) A o iai Iesu i le lalolagi, na tuuina atu e le Atua iā te ia le mana e faia ai vavega. O nei vavega na faaalai ai le alofa o Iesu i tagata, faapea mea matagofie ua toe o se aga ona ia faia lea i le lalolagi atoa.

1, 2. Na faapefea ona faamaonia le loloto o le alofa o Iesu i le fanau a tagata?



<sup>3</sup> O le afio mai o Iesu i le lalolagi, na mafai ai fo’i ona ia “folafola atu le tala lelei o le malo o le Atua.” (Luka 4:43) Na silafia e Iesu o lenei Malo o le a faapaiaina ai le suafa o lona Tamā, ma o le vaifofō tumau lea mo faafitauli o tagata. A o tala’i Iesu, sa ia faia le tele o vavega. O nei vavega, ua faaalua mai ai lona manatu mamafa i tagata uma. O le ā le tāua o lenā mea iā i tatou? Talu ai o mea na ia faia ua aumaia ai iā i tatou le faamoemoe ma le faamautinoaga mo le lumana’i. O lea, se’i o tatou iloiloina ni vavega se fā sa faia e Iesu.

### ‘UA IAI LE MANA IĀ TE IA E FAIA AI FAAMĀLŌLŌGA’

<sup>4</sup> A o faagasolo le faiva a Iesu, sa ia faimalaga atu i Kalilaia. I se tasi o aai i inā, na ia feiloa’i ai i se tamāloa ua matuā aafia i le lepela. (Mare. 1:39, 40) Na faamatalaina e le foma’i o Luka le ma’i o lenei tamāloa “ua lilofia lona tino i le lepela.” (Luka 5:12) “Ina ua ia iloa mai Iesu, ona ia faapa’ū faō lea ma augani mai iā te ia: ‘Le Alii e, a e finagalo i ai, e mafai lava ona e faamamā iā te a’u.’” E mautinoa sa iloa e le tamāloa o loo iai iā Iesu le mana e faamālōlō ai o ia, peita’i, sa ia fia iloa pe e **finagalo** Iesu e faia faapea. O le ā le auala na tali atu ai Iesu i lana talosaga? O ā ni mafauauga o Iesu e faatatau i lenei tamāloa ua faaleagaina lona tino? Po o le a pei Iesu o Faresaio, o ē na vaai maualo i tagata e mafatia i lenei faama’i? O le ā se gaioiga e te faia?

3. O le ā o le a iloiloina i lenei mataupu?

4. Faamatala le feiloa’iga a Iesu ma le lepela.

<sup>5</sup> E le’i alaga atu le tamāloa “E lē mamā, e lē mamā!” e pei ona faatonuina e le Tulafono a Mose. E le’i amana’ia e Iesu lenā vala, ae na ia ua’i atu i le tamāloa ma ona mana’oga. (Levi. 13:43-46) E tatou te lē iloa tonu mea sa mafau-fau i ai Iesu, peita’i, ua tatou iloa le mea sa iai i lona lotu. O le alofa mutimutivale, na uuna’ia ai o ia e faia se vavega. Sa ia pa’i atu i le tamāloa ma faapea atu i se uiga mautinoa ma agaalofa: “Ou te lotu i ai; ia mamā oe. Ona te’a ese loa lava lea o le ma’i lepela ia te ia.” (Luka 5:13) Sa tuuina atu e Ieova iā Iesu le mana e faia ai le vavega, ma faailoa atu ai e Iesu lona alofa i tagata.—Luka 5:17.

<sup>6</sup> O le mana o le Atua na mafai ai ona faia e Iesu le tele o vavega mata’ina. E lē gata sa ia faamālōlōina lepela, ae faapea fo’i isi ma’i eseese. Ua faapea mai le Tusi Paia: “Ona matuā ofo ai lea o le motu o tagata auā ua latou vāai ua tautatala o ē e gūgū, ua savavali pipili, ua pupula fo’i tauaso.” (Mata. 15:31) E le’i mana’omia e Iesu ni totoga o isi tagata, ina ia faamālōlōina ai isi. Ae sa iā te ia le mana e faamālōlō ai totoga o tagata na aafia. Sa vave ona ia faamālōlōina tagata, ma na ia faamālōlōina fo’i i latou sa mamao ese mai iā te ia. (Ioa. 4:46-54) O le ā e faaalua mai i nei faaa’oa’oga mata’ina? Ua aveā nei Iesu ma Tupu i le lagi, o loo iai iā te ia le mana ma le faanaunauga e aumaia ai le faamālōlōga tumau. O le auala na feutaga’i ai Iesu ma tagata, ua aumaia ai iā i tatou le

5. O le ā na uuna’ia ai Iesu e faapea atu, “Ou te lotu i ai” ina ua faamālōlōina le lepela?

6. Aiseā e mata’ina ai vavega na faia e Iesu, ma o le ā ua faaalua mai ai?

faamautinoaga o le a faataunuuna i le lalolagi fou le valoaga a le Tusi Paia: “E tigā alofa o ia i lē ua faatauva ma lē ua mativa.” (Sala. 72:13) I lenā taimi, o le a faamālōlō e Iesu tagata mafatia, auā o lona faanaunauga lenā.

### “INĀ TŪ IA I LUGA, IA AVE LOU MOEGA MA E SAVALI”

7 I nai masina talu ona faamālōlōina e Iesu le tamāloa lepela i Kalilaia, ona ia malaga atu lea i Iutaia ma faauau ona ia tala’i atu ai le tala lelei o le malo o le Atua. Na faalogo le faitau afe o tagata i le fe’au a Iesu, ma na pā’ia o latou loto i le alofa na ia faaalua. Sa matuā naunau Iesu e folafola atu le tala lelei i ē e matitiva, tala’i le sa’olotoga i ē ua ave faapagota, ma fusifusi i ē ua loto momomo. —Isa. 61:1, 2; Luka 4:18-21.

8 I le masina o Nisani, na malaga atu ai Iesu i Ierusalem e faamanatu le Paseka. Sa pisi le aai ina ua taunuu atu tagata mo le tausamiga. I le itu i mātū o le malumalu sa iai le vai e ta’ua o Petesaita, ma na feiloa’i ai Iesu ma se tamāloa e lē mafai ona savali.

9 E faimalaga atu le to’atele o tagata i Petesaita. Aiseā? Sa latou manatu e faamālōlōina faavavega se tagata ma’i pe a alu i le vai i le taimi e gaepu ai. Se’i mafaufau i le lē mautonu, popole, ma le leai o se faamoemoe o tagata na fia mālōlō. Sa lelei atoatoa Iesu ma e le’i mana’omia ona faamālōlōina o ia. Peita’i,

7, 8. O le ā na faia e Iesu ina ua tuua Kalilaia ma aga’i atu i Iutaia?

9, 10. (a) Aiseā na ō ai tagata i le vai o Petesaita? (e) O le ā na faia e Iesu i le vai, ma o le ā ua tatou a’oa’oina mai ai? (Taga’i i le ata i luga a’e o le matua.)

sa ia alu atu i inā ona o lona alofa i tagata. O i inā na ia feiloa’i ai i se tamāloa e umi atu ona ma’i, nai lo o le taimi na soifua ai Iesu i le lalolagi.—**Faitau le Ioane 5:5-9.**

10 Sa fesili atu Iesu i le tamāloa po ua fia mālōlō mai i lona ma’i. Se’i faaāta i o tatou mafaufau le faanoanoa o le tamāloa ina ua ia tali atu, e fia mālōlō ae e lē mafai, auā e leai se tasi e mafai ona tuuina ifo o ia i le vai. Sa faatonu e Iesu le tamāloa e fai se gaoioiga e lē mafai ona fai. Sa ia faapea atu e tū i luga e ave lona moega ma savali, ma o le gaoioiga lenā sa ia faia. O lenei vavega o se faamaoniga mata’ina lea o le mea o le a faia e Iesu i le lalolagi fou. Ua faaalua mai ai fo’i le alofa loloto o Iesu i tagata. Sa ia sa’ilia i latou na mana’omia le fesoasoani. O le faaa’oa’oga a Iesu ua faalaeiaua ai i tatou e faauau ona sa’ili tagata i la tatou oganuu, o loo mafatia ona o mea leaga o loo tutupu i lenei lalolagi.

### “O AI NA PA’I MAI I LO’U OFU?”

11 **Faitau le Mareko 5:25-34.** E 12 tausaga na aafia ai se fafine i se ma’i e māsiā ai. O lona ma’i na aafia ai vala uma o lona olaga, e aofia ai ma lana tapua’iga. “E tele mea ua tigā ai o ia ona o forma’i e to’atele, ua uma ai ana tupe” ae ua atili ai ona tigāina o ia. I se tasi aso, na sui lana fuafuaga ina ia manuia ai. Na alu atu lenei fafine i le motu o tagata ma pa’i atu i le ofu o Iesu. (Levi. 15:19, 25) Sa fesili Iesu po o ai na pa’i atu iā te ia, ina ua ia iloa ua alu ese atu le mana mai iā te ia. Sa “fefe ma tetemū”

11. E faapefea i le Mareko 5:25-34 ona faailoa mai ai le alofa Iesu i tagata mama’i?

le fafine ona ia 'faapa'ū lea i ona luma, ma faamatala mai le mea atoa na tupu.' Na silafia e Iesu ua faamālōlōina e Ieova le fafine, o lea na ia faapea atu ai ma le agalelei: "Lo'ū afafine e, ua e malosi ona o lou faatuatua. Alu ia ma le filemu, ma ia e mālōlō mai lou ma'i tigā."

<sup>12</sup> Ma'eu le alofa o Iesu i tagata, aemaise lava tagata mama'i! E matuā ese mai lava iā Satani, o lē e mana'ō e tatou te talitonu e leai so tatou aogā, ma e leai sē e alofa mai iā i tatou. Peita'i, o vavega a Iesu ua faamaonia mai ai lona manatu mamafa iā i tatou ma o tatou faafitauli. Ma'eu lo tatou lotofaafetai i se Tupu ma se Ositaulaga e lotoalofa faapena! (Epe. 4:15) Atonu e faigatā ona tatou ma-

**12.** (a) E tusa ma mea ua tatou a'oa'oina, e faapefea ona e faamatalaina Iesu? (e) O le ā le faaa'o-a'oga ua faataatia e Iesu mo i tatou?

lamalama i faalogona o se tasi ua umi ona aafia i se ma'i, aemaise pe afai e le'i tupu iā i tatou lenā tulaga. Ae sa alofa Iesu i tagata mama'i, e ui lava e le'i ma'i o ia. Se'i o tatou faia le mea sili e faaa'o-a'ō ai i lana faaa'oa'oga alofa.—1 Pete. 3:8.

### "UA TAGI IESU"

<sup>13</sup> Sa matuā ootia faalogona o Iesu ona o mafatiaga o isi. O se faaa'oa'oga, ina ua maliu lana uō o Lasalo, sa "ōi" Iesu ma "ootia lona finagalo" ina ua vaai atu i le mafatia o tauaiga ma uō a Lasalo. (**Faitau le Ioane 11:33-36.**) Sa tagi Iesu e ui sa ia iloa o le a ia toe faatūina Lasalo. Sa ia lē popole e iloa e isi ona faalogona. Sa alofa tele Iesu iā Lasalo

**13.** O le ā ua faailoa mai i le toetū o Lasalo e faatau iā Iesu?

O vavega a Iesu ua faamaonia mai ai lona manatu mamafa iā i tatou ma o tatou faafitauli  
(Taga'i i le palakalafa e 11, 12)





ma lona aiga, o lea na Ia faaaogā ai le mana mai i le Atua e toe faatū ai o ia.—Ioa. 11:43, 44.

<sup>14</sup> Ua faamatalaina e le Tusi Paia Iesu, ua pei o ia o lona Tamā o Ieova. (Epe. 1:3) O lea, o vavega na faia e Iesu ua faamaonia ai e finagalo Ieova e aveese ma’i, o tigā, ma le oti. Ua toe o se aga ona toe faatutūina lea e Ieova ma Iesu o ē ua maliliu. Na fetalai Iesu: “E oo mai le itula e ō mai ai i latou uma o loo i tuugamau.”—Ioa. 5:28, 29.

<sup>15</sup> O le toetū e aofia ai le manatuaina e le Atua o mea. E manatuaina e le Atua Silisili Ese o Lē na foafoaina mea uma, faamatalaga uma e faatatau i ē pele ua maliliu, e aofia ai ma o latou uiga. (Isa. 40:26) E lē gata e **mafai** ona manatuaina e Ieova i latou, ae o lona **finagalo** fo’i lenā. O toetū o loo ta’ua i le Tusi Paia, o faaa’oa’oga mata’ina na o mea o le a tutupu i le lalolagi fou.

### LESONA MAI I VAVEGA A IESU

<sup>16</sup> Pe a tatou tumau faamaoni, atonu o le a tatou maua le avanoa e molimauina ai se vavega silisili, o le faasaoina mai i le puapuaga tele. Pe a mae’a Amaketo, ona tatou vaaia lea o le tele o isi vavega. I lenā taimi, o le a maua e tagata le soifua mālōlōina lelei atoatoa. (Isa. 33:24; 35:5, 6; Faaa. 21:4) Se’i faaāta le vaai atu i tagata a o aveese a latou vaaiga, tootoo, o nofoa faataavalevale, ma mea faalogo. E silafia e Ieova, e ma-

**14, 15.** (a) E faapefea ona tatou iloa e finagalo Ieova e aveese mafatiaga o tagata? (e) E faapefea ona fesoota’i le toetū ma le manatuaina e le Atua o mea?

**16.** O le ā le avanoa o le a maua e le to’atele o au-auna a le Atua?

na’omia ona malolosi ma mālōlōina i latou o le a faasaoina mai iā Amaketo, auā e tele galuega e latou te faia. O i latou nei o le a liua le lalolagi atoa e aveama parataiso matagofie.—Sala. 115:16.

<sup>17</sup> Ua faalaeiauina le “motu o tagata e to’atele” i aso nei, pe a faitau i le auala na faamālōlō ai e Iesu ma’i. (Faaa. 7:9) O na vavega e faamalositia ai lo tatou faamoemoe matagofie, o le faamālōlōina atoatoa i le lumana’i. Ua faailoa mai ai fo’i le alofa tele o le Alo ulumatua o le Atua i le fanau a tagata. (Ioa. 10:11; 15:12, 13) O le alofa mutimutivale o Iesu, ua faaalua mai ai le alofa loloto o Ieova mo ana au-auna ta’ito’atasi.—Ioa. 5:19.

<sup>18</sup> Ua faatumulia le lalolagi i aso nei i tigā, mafatiaga, ma le oti. (Roma 8:22) O le māfuaaga lea e tatou mana’omia ai se lalolagi fou. O lea, ua folafola mai e le Atua o le a maua e tagata uma le soifua mālōlōina lelei atoatoa. Ua aumaia i le Malaki 4:2 le māfuaaga e tatou te talitonu ai o le a “osooso i le laueleele e pei o tama’i povi pepeti” i latou o le a faamālōlōina, o le a maua le fiafia ona ua faamālōlōina ma faasa’olotoina mai i le tulaga lē lelei atoatoa. Tau ina ia avealo tatou talisapaia o Ieova ma le faatua-tua i ana folafolaga, e uuna’ia ai i tatou e faia so o se mea e mana’omia ina ia ulu atu ai i le lalolagi fou. Ma’eu le faalaeiauina o i tatou i le iloaina o vavega na faia e Iesu, o faaa’oa’oga ia o le mapusaga tumau ua toe o se aga ona olioli ai lea o le fanau o tagata i lana pu-lega!

**17, 18.** (a) Aiseā na faia ai e Iesu vavega? (e) Aiseā e tatau ai ona e faia so o se mea ina ulu atu ai i le lalolagi fou a le Atua?



## E Mafai Ona Tumau lo Tatou Mamā

*‘Inā fafano ia o outou lima. Inā faamamā ia o outou loto.’*

—IAKO. 4:8.

UA TATOU ola i se lalolagi ua tumu i faiga lē mamā. O se faa-  
a’oa’oga, ua mafaufau le to’atele o se mea masani le faia o fe-  
usua’iga ma le itupā e tasi, po o le feusua’i ma se tasi e le’i  
faaipoipo i ai. Ua faatumulia ata tifaga, tusi, pese, ma faasala-  
lauga i feusua’iga lē mamā. (Sala. 12:8) Peita’i, o le fesoasoani  
a Ieova e mafai ona tatou ola ai i se auala e faafiafiaina ai o ia.  
E mafai ona tatou mamā i se lalolagi ua tumu i faiga lē mamā.  
—**Faitau le 1 Tesalonia 4:3-5.**

<sup>2</sup> E tatau ona tatou teena faanaunauga lē mamā, ina ia ta-  
tou ola ai i se olaga mamā. Peita’i, o lo tatou tulaga lē lelei ato-  
atoa, atonu e tatou te tosina ai i amioga lē mamā, e pei ona  
tosina o le i’a i se maunu. Pe a amata ona iai ni o tatou ma-  
faufauga lē mamā, e tatau ona vave lia’i ese. Pe a tatou lē faia  
faapea, ona amata lea ona malolosi na faanaunauga lē mamā,  
ma faia ai le agasala pe a maua le avanoa e faia ai. Ua faapea

1. O le ā le vaaiga a le lalolagi e faatatau i le tulaga mamā?
- 2, 3. (a) Aiseā e tāua ai ona tatou teena faanaunauga lē mamā? (e) O le ā o le a tatou iloiloaina i lenei mataupu?

**E FAAPEFEA ONA  
FESOASOANI MAU NEI IĀ  
I TATOU E TUMAU AI ONA  
MAMĀ?**

---

lakopo 1:14, 15

---

lakopo 4:8

---

lakopo 5:13-15

mai le Tusi Paia: ‘O le tu’inanau e fanau mai ai le agasala.’—**Faitau le Iakopo 1: 14, 15.**

<sup>3</sup> E mafai ona tuputupu a’e faanaunauga sesē i o tatou loto. O le mǎfuaaga lenā e mana’omia ai ona tatou faaeteete i mea e amata ona tatou faanaunau i ai. Pe a tatou teena faanaunauga lē mamā, o le a tatou ‘alofia ai le faia o feusua’iga lē mamā ma ona āuga leaga. (Kala. 5:16) I lenei mataupu, o le a tatou iloilo ina vala e tolu e fesoasoani iā i tatou e teena ai faanaunauga lē mamā: o la tatou faiā ma leova, o fautuaga i lana Afioga, ma le fesoasoani mai i Kerisiano ta’umatuaina.

#### **‘IA MAFUTA VAVALALATA ATU I LE ATUA’**

<sup>4</sup> O le ta’iala lenei a le Tusi Paia mo i latou e fia ‘mafuta vavalalata atu i le Atua’: ‘Inā fafano ia o outou lima. Inā faamamā ia o outou loto.’ (Iako. 4:8) Pe a faatāua la tatou faiā ma leova, o le a tatou taumafai malosi ai e faafiafia o ia i vala uma o o tatou olaga, e aofia ai ma o tatou mafaufauga. E tatou te manana’o e mamā o tatou loto, e ala i le ua’i o o tatou mafaufau i mea e mamā ma aogā. (Sala. 24:3, 4; 51:6; Fili. 4:8) E malamalama leova e tatou te lē lelei atoatoa, ma atonu e amata ona tatou mafaufau ai i mea e lē mamā. E tatou te faia taumafaiga uma e teena ai mafaufauga sesē, ona e tatou te lē manana’o e faanoanoa leova. (Kene. 6:5, 6) E tatou te faia taumafaiga uma ina ia mamā ai o tatou mafaufauga.

<sup>5</sup> E fesoasoani mai leova iā i tatou e te-

---

4. Aiseā e tāua ai ona tatou mafuta vavalalata iā leova?

5, 6. E faapefea ona fesoasoani le tatalo iā i tatou e tetele atu i faanaunauga lē mamā?

ena mafaufauga lē mamā pe a faaauau ona tatou tatalo mo lana fesoasoani. Ua ia foa’i mai lona agaga paia ina ia tatou maua ai le malosi e tumau ai ona mamā. Pe a tatou tatalo, ia faailoa atu iā leova e tatou te manana’o e faafiafia o ia i o tatou mafaufauga. (Sala. 19:14) E mafai ona tatou talosaga atu ma le lotomaulalo iā te ia, ina ia iloa se “ala e tigā ai” e ta’ita’ia ai i tatou i le faia o le agasala. (Sala. 139: 23, 24) Ia faaauau ona tatou talosaga iā leova e fesoasoani mai e teena amioga lē mamā ma faia le mea sa’o, e tusa pe e faitatā.—Mata. 6:13.

<sup>6</sup> O le auala na tatou ola a’e ai ma a tatou amioga i le taimi ua mavae, e atia’e ai iā i tatou le fiafia i amioga e ta’usalaina e leova. E ui i lea, e mafai ona ia fesoasoani mai iā i tatou e faia suiga mana’omia ina ia tatou auauna ai pea iā te ia i le auala na te taliaina. Sa iloa e Tavita lenā mea, ina ua uma ona ia faia le mulilua ma Patesepa, sa ia ‘ai’oi atu iā leova: “Ia e faia se lotomamā mo a’u, ma ia e tuu fo’i i totonu iā te a’u se agaga fou, o se agaga e tumau.” (Sala. 51:10, 12) Pe afai o loo tatou tauivi pea ma o tatou faanaunauga lē mamā sa iai i le taimi ua mavae, e mafai ona fesoasoani mai leova e faamalosi la tatou faanaunauga e usiusita’i iā te ia, ma taulau manuia ai. E mafai ona ia fesoasoani mai iā i tatou e pulea o tatou mafaufauga lē lelei atoatoa.—Sala. 119:133.


#### **‘IA AVEA MA Ē E USIUSITA’I I LE UPU’**

<sup>7</sup> E mafai ona tali mai leova i a tatou tatalo mo se fesoasoani e ala mai i le Tusi Paia. O le atamai o loo i le Afioga a le Atua “e muamua ona mamā.” (Iako. 3:17)

---

7. E faapefea ona fesoasoani le Afioga a le Atua e puipuia i tatou mai i mafaufauga lē mamā?





Pe a amata ona tuputupu a'e i o tatou loto se faanaunauga sesē, e tatau ona vave lia'i ese  
(Taga'i i le palakalafa e 6)

O le faitau o le Tusi Paia i aso ta'itasi ma manatunatu loloto i ai, o le a fesoasoani e puipuia ai o tatou mafaufau mai i mafau-fauga lē mamā. (Sala. 19:7, 11; 119:9, 11) O loo iai fo'i i le Tusi Paia faaa'oa'oga ma fautuaga ma'oti, e fesoasoani iā i tatou e 'alofia ai aafiaga o faanaunauga lē mamā.

<sup>8</sup> Ua faapea mai le Faataoto 5:8: "Ia faa-mamao ese lou ala mai i lea [fafine amio lē mamā], ma aua e te faalatalata atu i le faitoto'a o lona fale." O loo faamatala mai

**8, 9.** (a) O le ā na ta'ita'ia atu ai se alii talavou i le faia o feusua'iga ma se fafine amio lē mamā? (e) O ā tulaga i aso nei e mafai ona faatatau ai le faaa'oa'oga o loo i le Faataoto mataupu e 7?

i le mataupu e 7 o le Faataoto le mata'utia o le lē amana'ia o lenā fautuaga. Ua oo ina pō, ma ua savali atu se alii talavou e latalata i le fale o se fafine amio lē mamā. I lenā magāala, na faafeiloa'i ai o ia e se fafine o loo ofu i ofu faatosina. Ua tago atu le fafine iā te ia ma sogi iā te ia. O upu faatauana a le fafine, na faagae ai ni faanaunauga na faigatā ona ia teena. Sa la'ua faia feusua'iga lē mamā. E le'i fua-fua lenei alii talavou e faia amioga lē mamā. Peita'i, e le'i lava lona poto masani, ma leai se mafaufau lelei. E ui i lea, sa ia tofo lava i āuga leaga o ana gaoioiga. Pe ana ia malamalama i le lamatiaga,

atonu e mafai ona ia taumamao mai i lenā fafine.—Faata. 7:6-27.

<sup>9</sup> E pei o lenā alii talavou, atonu e iai fo’i taimi e tatou te faia ai filifiliga lē lelei ona o le lē malamalama i lamatiaga. O se faaa’oa’oga, o nisi pō e faaalua ai i nisi ala ata o le TV polokalame lē mamā. O lea, e telē le lamatiaga o le ki solo o le TV i le pō, ina ia vaai po o ā mea o loo faaali i le televise. E faapena fo’i le kiliki i polokalame i le Initaneti e tatou te lē malamalama i ai, o tuatusi o loo faalauiloaina ai amioga lē mamā ma faiga matagā taufeusua’iga, po o polokalame e fesoota’i ai ma isi i le Initaneti. I nei tulaga, o mea e tatou te vaai i ai e mafai ona tatou faanau-nau ai i mea e lē mamā, lea e i’u ai ina tatou lē ususita’i iā Ieova.

<sup>10</sup> Ua fesoasoani mai fo’i le Tusi Paia iā i tatou e ala i fautuaga e feutaga’i ai ma le isi itupā. **(Faitau le 1 Timoteo 5:2.)** O na fautuaga ua lapata’ia ai i tatou e ‘alofia le faatafai solo. E manatu nisi e leai se afāina o le faatafai e ala i gaoioiga, o tāga, po o le auala e pupula ai, auā e lē o fepa’ia’i tino. Peita’i, pe a faatafai ni tagata se to’alua, o le a amata ona atia’e mafaufauga lē mamā, ma ta’ita’ia atu ai i le faia o feusua’iga lē mamā. Na tupu muamua lenā mea, ma e mafai fo’i ona toe tupu.

<sup>11</sup> Sa gaoioi Iosefa i se auala atamai. Sa faaosooso o ia e le avā a Potifara e la te faia feusua’iga. Sa teena e Iosefa o ia, peita’i, sa ia faaosoosoina pea Iosefa. Sa ia talosaga atu iā Iosefa i aso ta’itasi ina ia la faatasi. (Kene. 39:7, 8, 10) Ua faamatalaina e se tasi o faitofā o le Tusi Paia, sa faamoemoe le avā a Potifara, e iai na o i la-

10. Aiseā e mata’utia ai le faatafai? (Taga’i i le ata i luga a’e o le matua.)

11. O le ā le faaa’oa’oga lelei na faataatia e Iosefa?

‘ua ma Iosefa i se nofoaga, ona faananau ai lea o Iosefa iā te ia. Peita’i, sa maumau-a’i pea Iosefa e lē tali atu i le faatafai mai o le fafine, po o le faatafai atu fo’i i ai. E na te le’i faatagaina ni faanaunauga sesē e tuputupu a’e i lona loto. I le taimi na tago atu ai le fafine i le ofu o Iosefa ma taumafai e faamalosi o ia e la te faia feusua’iga, sa vave ona gaoioi Iosefa. “A ua sola Iosefa ma alu i fafo ae ua tia’i i ai lona ofu o loo u’u i lona lima.”—Kene. 39:12.

<sup>12</sup> Ua lapata’i mai Iesu o mea e tatou te vāai i ai, e mafai ona aafia ai o tatou loto, ma atia’e ai tu’inaunauga sesē taufeusua’iga. Na ia faapea mai: “Ai se tasi e vaa-vaai pea i se fafine ma mana’ona’o i ai, ua uma ona mulilua ma ia i lona loto.” (Mata. 5:28) O le mea lenā na oo i le tupu o Tavita. Ua faapea mai le 2 Samuelu 11: 2, “ona ia iloa atu lea mai i luga o le fale o se fafine o loo tā’ele.” E le’i tilotilo ese o ia, ina ia tata’i ese ai lona mafaufau i se isi mea. O le mea lenā na ia mana’ona’o ai i le avā a se isi tamāloa, ma i’u atu ai i le faia o le mulilua.

<sup>13</sup> Pe a tatou manana’o e teena mafau-fauga sesē, e mana’omia ona tatou muli-muli i le faaa’oa’oga a Iopu. Na ia faapea mai: “Ua ou osia le feagaiga ma o’u mata.” (Iopu 31:1, 7, 9) E pei o Iopu, e mafai ona tatou filifili e aua ne’i mafaufau i se auala lē mamā pe a vaai i se isi tagata. Pe a tatou vaai i se ata o feusua’iga i le komepiuta, i luga o laupapa tetele, mekasini po o se isi lava mea, e tatau ona tatou vave tilotilo ese.

12. E faapefea ona iloa o mea e tatou te vaai i ai e aafia ai o tatou loto?

13. Aiseā e mana’omia ai ona faia se feagaiga ma o tatou mata, ma o le ā e aofia ai?

14 E tusa ai ma manatu na tatou iloilo-ina, e mana'omia ona fai a tatou tau-mafaiga ina ia teena ai faanaunauga lē mamā. Pe a mana'omia ona faia ni suiga, e tatau ona faia vave. Pe a tatou amana'ia fautuaga a Ieova, o le a mafai ona tatou 'alofia feusua'iga lē mamā ma tumau ai ona mamā.—**Faitau le Iakopo 1:21-25.**

### “INĀ AAMI ATU IA O TOEAINA”

15 Pe a faigatā ona teena faanaunauga sesē, ia talanoa atu i se Kerisiano ta'umatuaina i le faapotopotoga, ma o le a ia avatu iā te oe ni fautuaga mai i le Tusi Paia. E lē faigofie ona talanoa atu i isi e faatatau i o tatou lava faafitauli, peita'i, e tāua le sa'ilia o se fesoasoani. (Faata. 18:1; Epe. 3:12, 13) E mafai ona fesoasoani Kerisiano ta'umatuaina iā te oe e iloa suiga e mana'omia ona fai. O le faia o na suiga, o le a fesoasoani iā te oe e avefa pea Ieova ma au Uō.

16 Ua agavaa toeaina i le faapotopotoga e fesoasoani iā te oe. (**Faitau le Iakopo 5:13-15.**) E iai se uso talavou i Pasili sa faigatā ona ia teena faanaunauga sesē. Na ia faapea mai: “Sa ou iloa e lē fiafia Ieova i o'u mafaufauga, ae sa ou māsiasi e faasoa atu i se tasi o'u faalogona.” Sa iloa e se toeaina na mana'omia e le uso talavou le fesoasoani, ma faalaeiauina o ia e sa'ili i toeaina mo se fesoasoani. Na faapea mai le uso talavou: “Sa faate'ia a'u i le agalelei

---

14. O le ā e tatau ona tatou faia ina ia tumau ai ona mamā?

15. Aiseā e tāua ai ona tatou sa'ilia se fesoasoani, pe a faigatā ona tatou teena faanaunauga sesē?

16, 17. (a) E faapefea ona fesoasoani toeaina iā i latou o loo tauivi ma faanaunauga lē mamā? Aumai se faaa'oa'oga. (e) Aiseā e tāua ai ona vave sa'ilia se fesoasoani e i latou o loo matamata i ata ma faiga matagā taufeusua'iga?

o toeaina, sa latou matuā agalelei ma mamlalama, o se mea ou te lē'i faatalitalia. Sa latou faalogologo lelei i lo'u faafitauli. Sa latou faaaogā le Tusi Paia e faamautinoia mai ai le alofa o Ieova iā te a'u, ma talo mo a'u. O lea, na faigofie ai ona ou taliaina a latou fautuaga faale-Tusi Paia.” I tausaga mulimuli ane, sa ia aga'iga'i i luma faaleagaga. Ua ia faapea mai: “Ua ou iloa nei le tāua o le sa'ili mo le fesoasoani, nai lo o le taumafai e tauave a tatou lava avega.”

17 Pe a fai ma au masani le matamata i ata ma faiga matagā tau feusua'iga, e tatou ona e sa'ili vave mo se fesoasoani. O le umi e te lē sa'ili ai mo se fesoasoani, o le faateteleina lenā o le lamatiaga, ma i'u atu ai i le faia o feusua'iga lē mamā. O le a e faatigā ai i isi, ma ta'uleagaina ai le suafa o Ieova. Ua sa'ili le to'atele i toeaina mo le fesoasoani, ma ua latou talia fautuaga, ona e latou te manana'o e faafiafia Ieova, ma tumau ai i le faapotopotoga Kerisiano.—Sala. 141:5; Epe. 12:5, 6; Iako. 1:15.

### IA MAUMAU'A I TUMAU ONA MAMĀ

18 Ua faasolo ina matuā lē mamā le lalolagi a Satani. Peita'i, o loo taumafai pea auauna a Ieova e faatumau le mamā o o latou mafaufauga ma amioga. E matuā fiafia Ieova i na Kerisiano. O lea, se'i o tatou mafuta vavalalata iā Ieova, ma mulimuli i fautuaga mai i lana Afioga ma le faapotopotoga Kerisiano. O le faia faapea, o le a tatou maua ai le fiafia ma se lotofuatiaifo mamā. (Sala. 119:5, 6) Pe a mae'a ona aveesea Satani i le lumana'i, ona tatou ola lea e faavavau i le lalolagi fou mamā a le Atua.

---

18. O le ā ua e maumaua'i e fai?



# “AFAI E MAFAIA E KINGSLEY, OU TE MAFAIA FO‘I!”

INA ua pōpō atu lona tau‘au, ona amata loa lea o le faitauga Tusi Paia a Kingsley, o lona tofiga muamua lea i le A’oga o le Faiva Faatiokarate. Sa ia faaleo ma le manino upu ta’itasi e aunoa ma se fasi upu e misi, ae o le mea e ofo ai, e lē o vaai i lana Tusi Paia.

E nofo Kingsley i Sri Lanka ma e tauaso. E faalētonu lana faalogo ma e mana’omia se nofoa faataavalevale e fealua’i ai. Na faapefea ona a’o-a’oina lenei tamāloa e uiga iā Ieova, ma agavaa ai e auai i le A’oga o le Faiva Faatiokarate? Se’i o’u faamatala atu.

Ina ua ou faato’ā feiloa’i iā Kingsley, na ou ma-

ofa i lona galala faaleagaga mo upu moni o le Tusi Paia. Na latou su’esu’eina le Tusi Paia ma nisi o Molimau, ma ua foliga tuai lana tusi mo tagata tauaso o *Le Poto e Ta’ita’ia ai i le Ola e Faava-vau*.<sup>\*</sup> Na ia talia la’u valaaulia e toe fai lana su’esu’ega, peita’i e lua ni lu’i na ma fesaga’ia.

Muamua, e nonofo faatasi Kingsley ma isi i se nofoaga mo tagata matutua ma lē atoatoa le malosi o le tino. Talu ai o le pisa tele o le nofoaga ma le lē lelei o le faalogo a Kingsley, sa tatau ai ona ou leotele. O le i’uga, na lagona uma mai e tagata o le nofoaga la ma’ua su’esu’ega!

<sup>\*</sup> Lomia i le 1995, peita’i ua lē toe lomina nei.



Kingsley ma Paul



Lona lua, e lē tele ni faamatalaga fou e mafai ona faitau ma pu'eina e Kingsley a o faagasolo le su'esu'ega. Ina ia sologa lelei la ma su'esu'ega, sa tinoū ai Kingsley e sauniuni lelei. A o le'i faia a ma su'esu'ega, e na te faitau ma toe faitau le mataupu o le su'esu'ega, su'e mau i le Tusi Paia mo tagata tauaso, ona faavasega lea i lona mafaufau tali o fesili. Na matuā aogā lenei auala. E saofa'i o ia i le kapeta a o faia la ma'ua su'esu'ega, ma e na te pōpōina ma le fialia le kapeta a o faamatala leotele mea na ia a'oa'oina. E le'i leva ae faalua ona fai la ma su'esu'ega i le vaiaso e ta'i lua itula le uumi o su'esu'ega ta'itasi.

### AUAI I SAUNIGA MA FAIA SE SAO

Na naunau Kingsley e auai i sauniga i le Maota mo Sauniga, peita'i e lē o se mea faigofie. E na te mana'omia se fesoasoani e sii ai o ia i lona nofoa faataavalevale ma toe sii ese, e faapena fo'i i totonu o le taavale ma le Maota mo Sauniga. E auaua'i le to'atele o le faapotopotoga e fesoasoani iā te ia, ma e latou te manatu i ai o se faaeaga le faia faapea. A o faagasolo sauniga, e tuutuu e Kingsley lona taliga i le sipika e faalogologo lelei ai, ma faia ona sao.

Ina ua mavae sina taimi o faia lana su'esu'ega, na filifili ai loa Kingsley e auai i le A'oga o le Faiva Faatiokarate. A o toe lua vaiaso fai lana faitauga Tusi Paia muamua, na ou fesili iā te ia po ua sauni lana lauga. Na ia faapea mai ma le mautinoa: "Ua faatolu sefulu taimi o a'o la'u lauga."

Na ou faamālō atu iā te ia ma fai atu ou te fia faalogo a o ia faitauina le Tusi Paia. Na ia tatala lana Tusi Paia mo tagata tauaso, tuu i ai ona tama-tama'i lima ma faitau loa. Ae na ou mātauina e lē o faasolo ona lima i le itulau e pei ona masani ai. Na ia taulotoina le faitauga Tusi Paia atoa.

Na maligi o'u loimata ma vaai atu ma le lē tali-tonu. Na ou fesili iā Kingsley pe faapefea ona ia manatuaina lelei ae e na o le faatolu sefulu taimi na faata'ita'i ai. Na ia tali mai: "E leai, e faatolu sefulu ona faata'ita'i i le aso." I le silia i le masina, e saofa'i ai Kingsley i le kapeta, faitau ma toe faitau mau se'ia oo ina taulotoina.

Ua oo mai le aso o lana lauga i le Maota mo Sauniga. Ina ua mae'a lana lauga, na patipati ma le fialia le faapotopotoga ma e to'atele isi na fetagisi ona o le naunau o lenei failauga fou. Sa iai se tasi tagata tala'i ua lē toe faia ni lauga i le a'oga ona o le popole, ae ua toe mana'o nei e auai i le a'oga. Aisēā? Na ia faapea mai: "Afai e mafaia e Kingsley, ou te mafaia fo'i!"

Iā Setema 6, 2008, ina ua uma ona ia su'esu'eina le Tusi Paia mo le tolu tausaga, na faailoga ai e Kingsley lona tuuina atu iā Ieova, e ala i le papatisoga. O ia o se molimau faamaoni se'ia oo i lona maliu iā Me 13, 2014. Na mautinoa e Kingsley o le a faauau lana auunaga faamaoni i le lalolagi parataiso, i le malosi ma le soifua mālōlōina atoatoa. (Isa. 35:5, 6)—Faamatalaina e Paul McManus.



## Ola e Ōgatusa ma le Tatalo Faaa'oa'oa' Vaega I

*“Ia faapaiaina lou suafa.”*

—MATA. 6:9.

### PE E TE MANATUA?

O le ā e tatou te a'oa'o'ina mai i le faaupuga “Io matou Tamā”?

Aiseā e tatau ai ona tatou tatalo ina ia faapaia le suafa o le Atua?

E faapefea ona tatou ola e ōgatusa ma le talosaga ina ia faia le finagalo o le Atua i le lalolagi?

O LE to'atele o tagata ua latou taulotoina le tatalo a le Alii. Pe a tatou tala'i, e tatou te faaaogāina upu o lenā tatalo e a'oa'oa' ai i tagata, o le Malo o se pulega moni mai i le Atua o le a suia le lalolagi i se parataiso. E tatou te faaaogāina fo'i le ulua'i talosaga o lenā tatalo e faailoa atu ai e iai le suafa o le Atua, ma e tatau ona faamamaluina pe faapaiaina.—Mata. 6:9.

<sup>2</sup> Pe na finagalo Iesu e a'o faatauloto lenei tatalo i taimi uma e pei ona faia e isi? E leai. A o le'i faia e Iesu lenei tatalo faaa'oa'oa', na ia fetalai: “Pe a e tatalo, aua le tautū i upu masani.” (Mata. 6:7) I se tasi o taimi, na ia toe sii mai ai lenei tatalo, ae sui le auala e faapu ai. (Luka 11:1-4) O lea na fesoasoani mai Iesu iā i tatou e iloa mea e tatalo atu

1. E faapefea ona tatou faaaogāina le tatalo i le Mataio 6:9-13 i le faiva?
2. E faapefea ona tatou iloa e le'i finagalo Iesu e a'o faatauloto le tatalo faaa'oa'oa' pe a tatou tatalo?

ai, ma le auala e faatulaga e fua i lona tāua. Ua talafeagai ai ona ta'ua o le tatalo faaa'oa'o.

<sup>3</sup> I lenei mataupu ma le mataupu o loo sosoo mai, o le a iloiloina ai le uiga o lenei tatalo. A o tatou faia faapea, ia fesili ifo: E faapefea ona fesoasoani lenei tatalo faaa'oa'o e faaleleia ai a'u tatalo? A o le vala e sili ona tāua, po o o'u ola e o'gatusa ma lea tatalo?

### “LO MATOU TAMĀ E O I LE LAGI”

<sup>4</sup> Na ta'ua e Iesu le faaupuga “lo matou Tamā.” Ua faamanatu mai ai o Ieova o le Tamā o o tatou uso ma tuafāfine i le lalolagi aoao. (1 Pete. 2:17) O i latou ua filifilia e Ieova e ola e faavavau i le lagi, ua vaetamaina i latou e avea ma ona atalii, o lea ua avea Ieova ma o latou “Tamā” i se auala faapitoa. (Roma 8:15-17) O i latou o le a ola e faavavau i le lalolagi, o le a ta'ua fo'i Ieova o lo latou “Tamā.” O le a foa'i atu e Ieova iā i latou le ola ma tausia o latou mana'oga. O le a ta'ua i latou o fanau a le Atua, pe a latou maua le tulaga lelei atoatoa, ma tumau faamaoni i le tofotofoga mulimuli.—Roma 8:21; Faaa. 20:7, 8.

<sup>5</sup> E avatu e mātua i fanau se meaalofa matagofie, pe a a'oa'oina a latou fanau e tatalo ma fesoasoani iā i latou e vaai iā Ieova o se Tamā alofa. Ua faapea mai se

3. O ā fesili e mana'omia ona tatou manatunatu i ai a o iloiloina le tatalo faaa'oa'o?

4. O le ā ua faamanatu mai e le faaupuga “lo matou Tamā,” ma o le ā le itu ua avea ai Ieova ma Tamā o i latou e faamoemoe e ola i le lalolagi?

5, 6. O le ā le meaalofa sili e mafai ona avatu e mātua i fanau, ma o le ā e tatau ona faia e le tamaitiiti lava ia i lenā meaalofa? (Taga'i i le ata i luga a'e o le matua.)

uso o loo auaua nei o se ovasia mata-galuega i Aferika i Saute: “I le taimi na fananau ai la'u fanau teine, e matou te tatalo faatasi i pō uma, se'i vaganā ua ou lē iai i le fale. E masani ona faapea mai la'u fanau teine, e la te lē manatua lelei upu o na tatalo i le pō. Peita'i, e la te manatua le si'omaga, le mamalu o le fesoota'i atu i lo tatou Tamā o Ieova, ma faalogona to'afilemu ma le saogalemumu. I le taimi na amata ai ona la iloa tatalo, sa ou faalaeiauina i la'ua e tatalo leotele ina ia ou faalogo atu ai i le auala e faaleo atu ai o la'ua manatu ma faalogona iā Ieova. O se auala matagofie lea na mafai ona iloa ai mea o loo i o la'ua loto. Na amata lea ona ou fesoasoani iā i la'ua e faaofia ai ma vala tāua o loo i le tatalo faaa'oa'o, ina ia faaleleia ai a la'ua tatalo.”

<sup>6</sup> Na faaauau ona mafuta vavalalata atu lana fanau teine iā Ieova, a o tupu-tupu a'e. Ua faaipoipo i le taimi lenei, ma o loo auai ma a la'ua tane i le auau-naga faataimi atoa. O le meaalofa sili e avatu e mātua i a latou fanau, o le fesoasoani lea iā i latou e atia'e se faiā māfana ma vavalalata ma Ieova. Ae e tatau i le tamaitiiti lava ia ona faatumauiua lenā faiā tautele. E aofia ai le faatāua o le suafa o le Atua, ma faaogāina i se auala mamalu.—Sala. 5:11, 12; 91:14.

### “IA FAAPAIINA LOU SUAFA”

<sup>7</sup> Ma'eu se faaeaga ua tatou mauaina, o le iloaina lea o le suafa o le Atua, ma ua avea i tatou o “ni tagata mo lona suafa!” (Galu. 15:14; Isa. 43:10) E tatou

7. O le ā le faaeaga ua tatou mauaina, ma o le ā e mana'omia ona tatou faia?



te tatalo: “Ia faapaiaina lou suafa.” E tatou te tatalo fo’i iā Ieova e fesoasoani mai iā i tatou e aua ne’i faia se gaoioiga po o se faamatalaga e faalumaina ai o ia. E lē tatau ona tatou pei o nisi i le ulua’i senituri, o ē e le’i faatatauina mea na latou a’oa’o atu. Na tusi atu Paulo iā i latou: “Ua upuleagaina le suafa o le Atua i tagata o nuu ese ona o outou.”—Roma 2: 21-24.

<sup>8</sup> E tatou te faia mea uma e faapaia ai le suafa o Ieova. Na faapea mai se tuafafine mai Nouē, na tuua na o i la’ua ma lana tama e lua tausaga ina ua maliu lana tane: “O le taimi sili lenā ona faitatā o lo’u olaga. Na ou tatalo i aso ta’itasi ma toetoe o itula uma, mo le malosi ina ia pulea o’u faalogona, ma lē avatu ai iā Satani se māfuaaga e faifai ai iā Ieova, ona o sa’u filifiliga lē atamai po o le lē faamaoni fo’i. Ou te mana’o e faapaia le suafa o Ieova, ma ou te mana’o e toe vaai la’u tama i lona tamā i le Parataiso.”—Faata. 27:11.

<sup>9</sup> Na tali mai Ieova i ana tatalo. Sa faalaeiauina o ia i le faatasitasi e lē auua ma uso ma tuafafine. I le lima tausaga mulimuli ane, sa ia toe faaipoipo ai i se toeaina. Ua 20 nei tausaga o lana tama, ma ua avea nei o ia o se uso papatiso. Ua ia faapea mai: “Ou te matuā fiafia ona sa fesoasoani mai la’u tane iā te a’u e tausia o ia.”

<sup>10</sup> O le a faapaiaina atoatoa e Ieova lona suafa pe a aveesea i latou uma e lē

---

**8, 9.** Aumai se faaa’oa’oga o le auala na fesoasoani ai Ieova iā i latou na manana’o e faapaia lona suafa.

**10.** O le a faapefea ona faapaiaina atoatoa le suafa o le Atua?

faamamaluina ma teena o ia o lo latou Pule. (**Faitau le Esekielu 38:22, 23.**) I lenā taimi, o le a lelei atoatoa tagata, ma o le a tapua’i iā Ieova i latou uma i le lagi ma le lalolagi. O le a faapaiaina e foafoaga atamamai uma le suafa o le Atua. Pe a oo i lenā taimi, ona ‘pule aoao lea o le Atua i le aoao o mea.’—1 Kori. 15:28.

### “IA OO MAI LOU MALO”

<sup>11</sup> A o le’i toe afio Iesu i le lagi, na fesili ona soo: “Le Alii e, pe e te toe faavaeina le malo iā Isaraelu i le taimi nei?” Na tali Iesu e le’i oo i le taimi e latou te iloa ai le taimi e amata ona pule ai le Malo o le Atua. Na ia faatonu ona soo e ua’i atu i le galuega tala’i. (**Faitau le Galuega 1:6-8.**) Na ia a’oa’o fo’i ona soo e tatalo ia oo mai le Malo, ma ia latou tulimata’ia lenā taimi. O le māfuaaga lenā e tatou te tatalo ai pea ina ia oo mai le Malo.

<sup>12</sup> Ina ua latalata i le taimi e pule ai Iesu i le lagi, na fesoasoani Ieova i ona tagata e malamalama i le tausaga o le a tupu ai lenā mea. I le 1876, na tusia ai e Charles Taze Russell le mataupu, “Taimi o Nuū Ese: O Afea e I’u Ai?” Na ia faamatala ai o “taimi e fitu” i le valoaga a Tanielu, e tutusa ma “taimi atofaia o nuu ese” i le valoaga a Iesu. Na faamatalaina i le mataupu o le a faai’uina na taimi i le 1914.\*—Tani. 4:16; Luka 21:24.

---

\* Mo nisi faamatalaga e faatatau i le auala na faatau nuu ai lenei valoaga i le 1914, taga’i i le tusi *O ā A’oa’oga Moni a le Tusi Paia?* itulau e 215-218.

**11, 12.** I le 1876, o le ā na fesoasoani Ieova i ona tagata e malamalama i ai?



Po o e fesoasoani i lau fanau ina ia ola e ōgatusa  
ma le talosaga ia faia le finagalo o le Atua i le lalolagi?

(Taga'i i le palakalafa e 16)

<sup>13</sup> I le 1914, na gāpā ai se taua i Europa ma faasolo atu ai i le lalolagi aoao. O lenā taua, na faapogaia ai oge mata'utia. E oo ane i le faai'uga o le taua i le 1918, ua to'atelele atu tagata ua maliliu i se fulū mata'utia nai lo o tagata na fasiotia i le taua. O nei mea uma o vala o "le faailoga" na faamatala e Iesu. O lenā faailoga e faamaonia ai ua avea Iesu ma Tupu i le lagi i le 1914. (Mata. 24:3-8; Luka 21:10, 11) O le tausaga lenā na "alu atu o ia ina ia manumalo, ma e oo ina manumalo a'ia'i." (Faaa. 6:2) Sa tutuliese e Iesu Satani ma ana temoni

**13.** O le ā na tupu i le 1914, ma o le ā ua faamaonia i mea na tutupu i le lalolagi talu mai lenā tausaga?

mai i le lagi ma lafo mai i le lalolagi, ma ina ua mae'a lenā, ona amata ai lea ona faataunuaina le valoaga: "O'i talofa i le laueleele ma le sami, auā ua alu ifo iā te outou le Tiapolo ua lotoa tele, auā ua na iloa ua puupuu lona taimi."—Faaa. 12: 7-12.

<sup>14</sup> O le valoaga i le Faaaliga mataupu e 12, ua fesoasoani iā i tatou e malamalama ai i le māfuaaga ua tutupu ai mea leaga i le lalolagi, i le taimi na avea ai Iesu ma Tupu i le Malo o le Atua. Ua pule Iesu i le lagi, peita'i, ua pule Satani i le lalolagi. E ui i lea, ua toe o se aga

**14.** (a) Aiseā e tatou te tatalo ai pea ina ia oo mai le Malo o le Atua? (e) O le ā le galuega tāua e tatau ona tatou faia i le taimi lenei?

ona “manumalo a’ia’i” lea o Iesu e ala i le aveesea o ē amioleaga uma mai i le lalolagi. A o le’i oo atu i lenā taimi, e tatou te tatalo pea ina ia oo mai le Malo o le Atua, ma maelega fo’i i le tala’ia o lenā Malo. O la tatou galuega e faatau-nuu ai le valoaga a Iesu: “O le a tala’iina atu lenei tala lelei o le malo i le lalolagi atoa e fai ma molimau i atunuu uma; ona oo mai ai lea o le i’uga.”—Mata. 24:14.

### “IA FAIA LOU FINAGALO I LE LALOLAGI”

<sup>15</sup> I le pe ā ma le 6,000 tausaga ua mavae, na faia ai le finagalo o le Atua i le lalolagi. O le māfuaaga lenā na fetalai ai le Atua “ua matuā lelei lava” mea uma. (Kene. 1:31) Peita’i na fouvale Sātani, ma talu mai lenā taimi ua lē faia e le to’atele le finagalo o le Atua. Ae i aso nei, ua pe ā ma le valu miliona tagata o loo auauna iā Ieova. O loo latou **tatalo** ina ia faia le finagalo o le Atua i le lalolagi, ma o loo latou **faia** fo’i lona finagalo. Ua latou ola i se auala e faafiafia ai le Atua, ma maelega e a’oa’o isi e faata-tau i le Malo.

<sup>16</sup> O se faaa’oa’oga, ua faapea mai se tuafafine sa misionare i Aferika na papatiso i le 1948: “E masani ona ou tatalo ina ia maua ni ē e pei o ni mamoe, ma fesoasoani iā i latou e iloa Ieova, manū o maua le taimi. E lē gata i lea, pe a ou molimau i se tagata, ou te tatalo mo le atamai ina ia pā’ia ai le loto o lenā tagata. Ou te tatalo fo’i iā Ieova ina ia fesoasoani mai i a tatou taumafaiga e

**15, 16.** Pe e lava le tau ina tatalo ina ia faia le finagalo o le Atua i le lalolagi? Faamatala.

tausia i latou e pei o ni mamoe ua mauaina.” E to’atele i latou na fesoasoani i ai lenei tuafafine ina ia a’oa’oina e faata-tau iā Ieova. Pe e mafai ona tatou mafaufau i nisi tagata matutua o loo maelega e faia le finagalo o le Atua? —**Faitau le Filipi 2:17.**

<sup>17</sup> A o le’i oo i le taimi e aveesea ai e Ieova ona fili mai i le lalolagi, e faaaauu lava ona tatou tatalo ina ia faataunuu lona finagalo. O le a avea le lalolagi ma parataiso, ma o le a toe faatutūina le faitau piliona o tagata. Na fetalai Iesu: “Aua tou te ofo i lenei mea, auā e oo mai le itula e faalogo ai i latou uma o loo i tuugamau i [lo’u leo], ma latou ō mai ai.” (Ioa. 5:28, 29) Se’i mafaufau i lo tatou fiafia e toe feiloa’i ma ē pele o le a toetutū mai. O le a soloiese e le Atua “loimata uma i o [tatou] mata.” (Faaa. 21:4) O le to’atele o le a toetutū mai o “tagata amiolētonu,” o ē na maliliu a o le’i a’oa’oina le upu moni e faata-tau iā Ieova ma Iesu. O le a tatou olioli e a’oa’oina i latou i le finagalo o le Atua, ina ia maua ai le “ola e faavavau.”—Gal. 24:15; Ioa. 17:3.

<sup>18</sup> Pe a oo mai le Malo o le Atua, o le a faapaiaina ai lona suafa, ma o le a tapua’i atu ma le autasi i latou uma i le aoao o mea iā Ieova. O le a faamalieina mana’oga silisili o tagata pe a taliina ulua’i talosaga e tolu o le tatalo faaa’oa’o. I le mataupu o loo sosoo mai, o le a iloiloaina ai isi talosaga tāua e fā na a’oa’o mai i tatou e Iesu e tatalo i ai.

**17.** O ā ni ou faalogona e faata-tau i mea o le a faia e Ieova i le lumana’i mo tagata i le lalolagi?

**18.** O le ā e mana’omia moni e tagata?



# Ola e Ōgatusa ma le Tatalo Faaa’oa’o Vaega II

*‘Ua silafia e lo outou Tamā o i le lagi mea o loo outou mana’omia.’—MATA. 6:8.*

E LĒ galo i se tuafafine paeonia e igoa iā Lana le aso na malaga ai i Siamani i le 2012. Na ia manatu sa tali mai leova i ana tatalo e lua. A o ia malaga i se nofoaafi aga’i i le malae vaalele, sa ia talosaga i le fesoasoani a leova ina ia maua se tagata e tala’i ai. E taunuu atu i le malae vaalele, ua tolopō lana faigāmalaga i le aso e sosoo ai. Sa ia talosaga iā leova mo le fesoasoani, ona ua toetiiti uma lana tupe, ae e mana’omia se mea e mālōlō ai i le pō.

<sup>2</sup> I le taimi na mae’a ai lana tatalo, ae ia faalogoina loa se tasi o loo valaau mai, “Malo Lana, o le ā lau mea o loo fai iinei?” O le tama sa valaau mai, na la a’o’oga faatasi. Sa ō atu ma lona tinā ma le tinā o lona tinā, e faaee o ia e alu i Aferika i Saute. Sa valaaulia e le tinā o le tama ma le tinā o lona tinā Lana e latou te ō i le fale, ina ua uma ona faamatala i ai e Lana lona tualaga. Sa tele a la’ua fesili e faatatau i talitonuga a Lana, faapea lana auunaga paeonia.

<sup>3</sup> A o fai la latou mālū taeao i le aso na sosoo ai, sa taliina e

1-3. Aiseā na mautinoa ai e se tuafafine e silafia e leova ona mana’oga?

## PE E TE MANATUA?

O le ā e aofia i la tatou tatalo ina ia foa’i mai a tatou mea’ai i aso ta’itasi?

O le ā e mana’omia ona tatou faia ina ia faamagaloina ai a tatou agasala?

Ua faapefea ona tali mai leova i la tatou talosaga ina ia lavea’i i tatou mai i faaososoga?



Lana le tele o a la'ua fesili e faatatau i le Tusi Paia. Sa tapa e Lana la la'ua tuatusi, ina ia mafai ona faafesoota'i e se tasi i la'ua e faaauau la latou talanoaga. Sa toe fo'i ma le saogalemu Lana i lona aiga, ma o loo faaauau pea lana paeonia. Sa ia manatu na tali mai Ieova i ana tatalo, sa ia silafia ona mana'oga, ma na ia fesoasoani mai.—Sala. 65:2.

<sup>4</sup> Pe a faafuase'i ona tula'i mai se faafitauli, e faigofie ona tatou tatalo iā Ieova mo le fesoasoani, ma e fiasia o ia e faafofoga mai. (Sala. 34:15; Faata. 15:8) Peita'i, o le tatalo faaa'oa'o a Iesu ua a'oa'oina ai i tatou i mea e sili ona tāua e tatalo ai. I lenei mataupu, o le a iloiloina ai le auala e fesoasoani ai talosaga mulimuli e fā o le tatalo faaa'oa'o iā i tatou e faamaoni ai iā Ieova. —**Faitau le Mataio 6:11-13.**

### “IA E FOA'I MAI I LE ASO NEI A MATOU MEA'AI MO LE ASŌ”

<sup>5</sup> Na a'oa'o e Iesu i tatou e tatalo mo a “[tatou] mea'ai,” nai lo o le faapea atu “la'ua mea'ai.” Na faapea mai Victor, o se ovasia matagaluega i Aferika: “E masani ona ma faafetai ma la'ua avā iā Ieova ona e ma te lē popole i se mea'ai, ma po o ai fo'i o le a togiina le fale. E tausia ma le agalelei i ma'ua e uso i aso ta'itasi. Peita'i, ou te tatalo ina ia mafai ona fesaga'ia e i latou o loo fesoasoani mai faigatā tau tamaoaiga.”

<sup>6</sup> Atonu e tele a tatou mea'ai, peita'i o le to'atele o o tatou uso e matitiva, po o loo aafia fo'i i mala faalenatura. E lē gata e mafai ona tatou tatalo mo i latou, ae e mafai fo'i ona tatou fesoasoani atu. O se faaa'oa'oga, e mafai ona faaso'a atu iā i latou mea ua tatou maua. E mafai fo'i ona tatou faia

4. O le ā o le a tatou iloiloina?

5, 6. Aiseā na a'oa'o ai e Iesu i tatou e tatalo mo a tatou mea'ai, e tusa pe e tele a tatou mea'ai?

e lē aunoa ni foa'i mo le galuega i le lalolagi aoao mo tagata o Ieova. E tatou te iloa o nei foa'i e mafai ona fesoasoani i mana'oga o o tatou uso.—1 Ioa. 3:17.

<sup>7</sup> Na mae'a loa ona a'oa'o mai e Iesu le tatalo faaa'oa'o, ona ia a'oa'oina lea o i tatou e aua le ua'i atu i meafaitino. Na ia faapea mai pe afai e faaofuina e le Atua laau o le vao, “pe e lē sili ea ona ia faaofuina outou o ē faatuatua itiiti? O lea, ia aua lava ne'i outou popole ma faapea ane, . . . 'O le ā fo'i se mea tatou te oofu ai?” Na faai'u lana faamatalaga i le fautuaga tāua lenei: “Ia aua ne'i outou popole mo le aso a taeao.” (Mata. 6:30-34) E lē tatau ona tatou popole i o tatou mana'oga i le lumana'i. Nai lo o lea, ia tatou lotomalilie i mea ua tatou maua i aso ta'itasi. O se faaa'oa'oga, e mafai ona tatou tatalo mo se nofoaga e nonofo ai, se galuega e tausii ai o tatou aiga, ma le atamai e faia ai filifiliga lelei e faataatau i le soifua mālōlōina. Peita'i, e iai se mea e sili atu ona tāua e mana'omia ona tatou tatalo ai.

<sup>8</sup> O fetalai a Iesu e faatatau i a tatou mea'ai i aso ta'itasi, ua faamanatu mai ai o tatou mana'oga faaleagaga. Na ia fetalai: “E lē na o mea'ai e ola ai le tagata, ae o afioga uma e tulei mai i le fofoga o Ieova.” (Mata. 4:4) O lea, e tatau ona tatou tatalo e faaauau ona fafaga i tatou e Ieova i mea'ai faaleagaga i le taimi tatau.

### “FAAMAGALO MAI I A MATOU AGASALA”

<sup>9</sup> Na fetalai Iesu: “Ia faamagalo a matou agasala.” Ae aiseā na ia fetalai ai i se isi

7. Na faapefea ona a'oa'o e Iesu i tatou e 'aua ne'i popole mo le aso a taeao'?

8. O le ā ua faamanatu mai i fetalai a Iesu e faatatau i a tatou mea'ai i aso ta'itasi? (Taga'i i le ata i luga a'e o le matua.)

9. Aiseā ua pei ai a tatou agasala o ni “aitalafu”?

taimi, ina ia “faamagalo mai i a matou aitalafu”? (Luka 11:4; Mata. 6:12, fpl.) Na māfua ona ia fetalai faapea, ona o a tatou agasala e tai pei o ni aitalafu. Na faamatala i *Le Olomatamata* i le 1951, e tai pei e tatou te nofo aitalafu iā Ieova pe a tatou faia se agasala. E faatalitalia e Ieova i tatou e alolofa ma usiusita’i iā te ia. O lea, pe a tatou agasala i le Atua, ua tatou lē avatuina la iā te ia mea o loo ia faatalitalia mai iā i tatou. Pe a finagalo i ai Ieova, e mafai ona ia faamutaina la tatou faigāuō. Na ta’ua atili i le mekasini: “O le faia o le agasala, o le lē alofa lea i le Atua.”—1 Ioa. 5:3.

<sup>10</sup> Ma’eu lo tatou lotofaafetai ona ua saunia e Ieova le taulaga togiola a Iesu e faamagalo ai a tatou agasala! E tatou te mana’omia le faamagaloga a Ieova i aso ta’itasi. Na maluu Iesu mo i tatou i le pe ā ma le 2,000 tausaga ua mavae, ma ua tatou maua ai aogā i aso nei. E tatau la ona tatou faafetai e lē aunoa iā Ieova mo lenei mealofa tautele. E leai se tasi o i tatou e mafai

10. Aiseā ua mafai ai ona faamagaloina e Ieova i tatou, ma o ā ni o tatou faalogona e faatatau i lenā tulaga?

ona faia le togiola lea e faasa’oloto mai ai i tatou mai i le agasala ma le oti. (**Faitau le Salamo 49:7-9; 1 Peteru 1:18, 19.**) O faaupuga i le tatalo faaa’oa’o “ia faamagalo a **matou** agasala,” ua faamanatu mai ai e tatou te mana’omia le togiola, ma e faapena fo’i o tatou uso ma tuafāfine. E finagalo Ieova e tatou te manatunatu i le itu faaleagaga o isi. E aofia ai le vave ona faamagalo atu pe a latou agasala mai. E masani lava o ni masei lāiti, ae pe a tatou faamagalo atu i o tatou uso, e faailoa atu ai e tatou te alolofa iā i latou. E faailoa atu ai fo’i lo tatou lotofaafetai iā Ieova mo le faamagaloina o i tatou.—Kolo. 3:13.

<sup>11</sup> O lo tatou tulaga lē lelei atoatoa, atonu e faigatā ai i nisi taimi ona tatou faamagalo atu i ē e faatigā mai. (Levi. 19:18) Pe a amata ona tatou talanoa e faatatau i mea na faia e isi iā i tatou, o le a aafia ai ma isi i le faapotopotoga ma lepetia ai le autasi o le faapotopotoga. Pe a faaauau ona tupu lenā mea, e faailoa atu ai e lē tāua iā i tatou le mealofa a le Atua o le togiola, ma o le a tatou lē maua ai ona aogā. Pe a tatou te lē

11. Aiseā e tāua ai ona faamagalo atu i isi?

la tatou faamagalo atu i isi pe a tatou manana’o e faamagalo i tatou e le Atua  
(Taga’i i le palakalafa e 11)



faamagalo atu i isi, o le a lē faamagaloina fo’i i tatou e Ieova. **(Faitau le Mataio 6: 14, 15; Mata. 18:35)** Pe a tatou manana’o e faamagaloina i tatou e Ieova, e tatau ona ‘alofia le faia o agasala matuiā.—1 Ioa. 3: 4, 6.

### ‘AUA NE’I TUUA I MATOU E LOLO ATU I FAAOSOOSOGA’

<sup>12</sup> O faaupuga i le tatalo faaa’oa’o ia “aua fo’i ne’i tuua i matou e lolo atu i faaosoosoga,” ua faamanatu mai ai le mea na tupu iā Iesu ina ua faato’ā uma ona papatiso. Sa ta’ita’ia o ia e le agaga paia o le Atua i le toafa ina ia “faaosoosoina ai o ia e le Tiapolo.” (Mata. 4:1; 6:13) Aiseā na faataga ai e Ieova lenā mea e tupu? Na tena e Atamu ma Eva le pule a Ieova. Sa lāgā ai e Satani fesili na mana’omia se taimi umi e tali ai. O se faaa’oa’oga, pe e iai se mea na sesē i le auala na foafoaina ai e Ieova le tagata? Pe e mafai ona tumau faamaoni iā Ieova se tagata lelei atoatoa pe a faaosoosoina e “lē o loo leaga”? Pe e sili atu fo’i ona lelei pe a pulea e tagata i latou lava? (Kene. 3:4, 5) O le faamaoni o Iesu i le Atua ua faamaonia ai le pepelo o le Tiapolo. Pe a taliina nei fesili uma i le luma’i, o le a iloa ai e foafoaga uma i le lagi ma le lalolagi, e sili atu ona lelei le pule a Ieova.

<sup>13</sup> E paia Ieova, ma e na te lē faaosoosoina i tatou e faia se mea leaga. Peita’i, o le Tiapolo “o lē e faaosooso.” (Mata. 4:3) Ua taumafai Satani e faaosoosoina i tatou i le tele o auala. Peita’i, e tatou te faia le filifiliga pe e teena le faaosoosoga, po o le lolo atu fo’i i ai. **(Faitau le Iakopo 1:13-15.)** Sa

**12, 13.** (a) O le ā na tupu iā Iesu ina ua mae’a lona papatisoga? (e) Aiseā e lē tatau ai ona tuua’ia isi pe a tatou lolo atu i se faaosoosoga? (i) O le ā na faamaonia e Iesu i lona faamaoni se’ia oo i le oti?

vave lava ona teena e Iesu faaosoosoga ma sii atu mau mai i le Afioga a le Atua, ina ua faaosoosoina o ia e Satani. Sa ia faamaoni i le Atua. Peita’i, e le’i faavaivai ai Satani. Sa ia faatalitali “se’ia oo i se isi taimi talafeagai.” (Luka 4:13) Po o ā lava taumafaiga a Satani, ae sa usita’i pea Iesu i le Atua o lona pule. Sa ia faamaonia atu e mafai e le tagata lelei atoatoa ona faamaoni iā Ieova e tusa pe e feagai ma tulaga e sili ona faitatā. Peita’i, e taumafai fo’i Satani e faaosoosoina i tatou o soo o Iesu, ina ia lē usita’i iā Ieova.

<sup>14</sup> O loo mana’omia lava ona taliina fesili na lāgā e Satani e faatatau i le pule a Ieova. O lea, o loo faataga pea e Ieova Satani e faaosoosoina i tatou. E lē tuuina atu e Ieova i tatou i le faaosoosoga. E na te silafia e mafai ona tatou faamaoni iā te ia, ma e finagalo o ia e fesoasoani mai. Peita’i, e lē faamalosia e Ieova i tatou e faia le mea sa’o, auā e na te amana’ia lo tatou sa’olotoga e filifili ai. O lea, ua ia tuuina mai iā i tatou le filifiliga e faamaoni pe e lē faamaoni fo’i iā te ia. O mea nei e lua e mana’omia ona tatou faia ina ia ‘alofia ai le lolo atu i faaosoosoga: ia mafuta vavalalata iā Ieova, ma ia tatalo atu pea mo le fesoasoani. E faapefea ona tali mai Ieova i la tatou tatalo ina ia teena faaosoosoga?

<sup>15</sup> Ua foa’i mai e Ieova lona agaga paia e fesoasoani iā i tatou e teena ai faaosoosoga a Satani. Ua ia saunia mai fo’i le Tusi Paia ma le faapotopotoga e lapata’ia ai i tatou e faatatau i lamatiaga. O se faaa’oa’oga, ua ia lapata’ia i tatou e aua le faaaogaina le tele o le taimi, tupe ma le malosia i mea e

**14.** O le ā e mana’omia ona tatou faia ina ia teena ai faaosoosoga?

**15, 16.** (a) O ā nisi o faaosoosoga e mana’omia ona tatou teena? (e) O ai e tuua’ia pe a tatou lolo atu i faaosoosoga?



la faatumau lou malosī faaleagaga ma le maelega i le faiva  
(Taga'i i le palakalafa e 15)

tatou te lē mana'omia moni. E nonofo Espen ma Janne i se atunuu tamaoaiga i Europa. Sa la paeonia sauatoa mo le tele o tausaga, i se vaipanoa na telē ai le mana'oga. Ae na la'ua lē toe paeonia ina ua fanau la la'ua tama, ma i le taimi lenei ua to'alu la la'ua fanau. Ua faapea mai Espen: "E masani ona ma tatalo iā Ieova, ina ia aua ne'i ma'ua lolo atu i le faaososoga, ma faaitiitia ai lo ma'ua taimi e faalu i mea faaleagaga, nai lo o le taimi muamua. E ma te tatalo iā Ieova e fesoasoani mai e faatumau lo ma'ua malolosī faaleagaga, ma le maelega i le faiva."

<sup>16</sup> O se isi faaososoga e mana'omia ona teena o le matamata i ata matagā taufeusua'iga. Pe a tatou lolo i lenā faaososoga, e

lē tatau ona tatou tuua'ia Satani. Aiseā? Auā e lē faamalosia e Satani ma lana lalolagi i tatou e fai se mea e tatou te lē mana'o e fai. Ua matamata nisi i nei ata matagā, ona o le lē teena o mafauauga sesē. Peita'i, ua teena e le to'atele o o tatou uso ma tuafāfine lenei faaososoga, ma e mafai fo'i ona tatou faia faapea.—1 Kori. 10: 12, 13.

### "LAVEA'I IĀ I MATOU MAI I LĒ O LOO LEAGA"

<sup>17</sup> Ina ia ola e ōgatusa ma le talosaga e "lavea'i iā i matou mai i lē o loo leaga," e tatau ona taumafai ia lē avea i tatou "o ni tagata o le lalolagi [a Satani]" ma "aua le mana'o i le lalolagi [a Satani] po o mea o iai i le lalolagi." (Ioa. 15:19; 1 Ioa. 2:15-17) Ma'eu se mapusaga o le a tatou maua pe a aveesea e Ieova Satani, ma faaumatia lenei lalolagi leaga. A o le'i oo atu i lenā taimi, ia tatou manatua le lotoa tele o Satani, auā ua ia iloa ua puupuu lona taimi. O le a ia faia mea uma e taofia ai i tatou mai i le auna atu iā Ieova. O lea, e tatau ona tatou tatalo pea iā Ieova ina ia puipuia i tatou mai iā Satani.—Faa. 12:12, 17.

<sup>18</sup> Pe e te fia ola i se lalolagi e aunoa ma Satani? O lea, ia faaauau ona tatou tatalo ia oo mai le Malo o le Atua, ia faapaiaina le suafa o le Atua, ma ia faia lona finagalo i le lalolagi. Ia faaauau ona tatou faalagolago i le tausiga a Ieova, ma o le a ia foa'i mai mea e tatou te mana'omia ina faamoni ai iā te ia. O lea, ia tatou faia mea uma ina ia ola ai e ōgatusa ma le tatalo faa'o-a'o.

<sup>17.</sup> (a) E faapefea ona tatou ola e ōgatusa ma le talosaga e 'lavea'i i tatou mai i lē o loo leaga'? (e) O le ā le mapusaga ua toeitiiti ona tatou maua?

<sup>18.</sup> O le ā e tatau ona tatou faia pe a tatou mana'o e faasaoina i tatou mai i le i'uga o le lalolagi a Satani?



# “E Tatau Ona Outou Tumau”

INA ua uma ona papatiso Anita\* e avea ma Molimau a Ieova, na matuā teteē lona to’alua. Ua faapea mai Anita: “Na ia taofia a’u mai lo’u alu i sauniga ma faasā a’u e aua ne’i toe ta’ua le suafa o le Atua. Na matuā ita lo’u to’alua iā te a’u pe a ou ta’uina le suafa o Ieova.”

O le a’oa’oina o tamaiti e faatatau iā Ieova, o se isi lu’i lea iā Anita. “Na matuā faasā le tapua’iga iā Ieova i totonu o lo’u lava aiga. E le’i mafai ona matou su’esu’e ma la’u fanau pe ave fo’i i latou i sauniga.”

Ua faaalua mai i le mea na tupu iā Anita, e mafai ona avea teteega mai i aiga o se lu’i i le faamaoni o se Kerisiano. O isi lu’i o se ma’i faaumiumi, le oti o se tamaitiiti po o se paaga, po o le fulitua o se tasi o le aiga iā Ieova. O le ā e mafai ona fesoasoani i se Kerisiano e tumau ai i le faamaoni iā Ieova?

O le ā e te faia pe a fesaga’ia na faafitauli? Ua faapea mai Paulo: “E tatau ona outou tumau.” (Epe. 10:36) O le ā e fesoasoani iā te oe e tumau ai?

## TATALO MA FAALAGOLAGO IĀ IEOVA

O se tasi o vala autū e tatou te maua ai le malosi e mana’omia ona tumau ai i tofotofoga, o le tatalo lea ma faalagolago iā Ieova. O se faaa’oa’oga, i se tasi o aoauli i se Aso Gafua, na tupu ai se faalavelave i le aiga o Ana. Na faafuase’i ona maliu lana tane ae ua 30 tausaga talu ona la faaiipo. Na faapea mai Ana: “Na lē toe fo’i mai o ia mai i le galuega, ae e na o le 52 ona tausaga.”

Na faapefea ona faafetaia’ia e Ana lenā lu’i? Sa tatau ona toe faigaluega Ana, ma na fesoasoani lea iā te ia auā e mana’omia le ua’i atu atoatoa i lana galuega, peita’i e le’i aveesea ai ona tigā. Na ia faapea mai: “Na saasaa atu lo’u loto iā Ieova ma ole atu iā te ia e fesoasoani mai i lo’u tulaga faa-

vauvau.” Pe na taliaina e Ieova ana tatalo? Na ia mautinoa na taliaina ana tatalo. Ua faapea mai o ia: “O le filemu lea e na o le Atua e na te aumaia na faato’afilemu ai a’u ma sagatonu ai pea lo’u mafaufau. Ou te mautinoa o le a toe faatūina mai e Ieova lo’u to’alua i le aso o le toetū.”—Fili. 4:6, 7.

Ua folafola mai e “Le Faafofoga tatalo” e na te saunia mea e mana’omia e ana auauna ina ia faamaoni ai iā te ia. (Sala. 65:2) Pe e te lē ioe o lenei faamautinoaga e faamalosia ai le faatuatua? Pe e lē fesoasoani fo’i lenā folafolaga iā te oe e tumau ai?

## SAUNIGA FAA-KERISIANO O LE PUNA LEA O FAALAEIAUGA

Ua faalaeiauina e Ieova ona tagata e ala mai i le faapotopotoga Kerisiano. O se faaa’oa’oga, ina ua fesaga’i le faapotopotoga i Tesalonia ma sauāga mata’utia, na faalaeiau atu Paulo i na Kerisiano ina ‘ia latou fefaamāfanafanaa’i pea ma atia’e e le tasi le isi, e pei lava ona latou faia.’ (1 Tesa. 2:14; 5:11) Na mafai e Kerisiano i Tesalonia ona sao mai i na tofotofoga o lo latou faatuatua, e ala i le autasi i le alofa ma fesoasoani le tasi i le isi. O faamaumauga o lo latou tumau ua avea ma faaa’oa’oga lelei mo i tatou i aso nei, ma ua faaalua mai ai e mafai fo’i ona tatou tumau.

O le atia’e o se faauōga māfana ma sui o le faapotopotoga, e fesoasoani iā i tatou e fefaasoa’i ai i “mea e atia’e ai e le tasi le isi.” (Roma 14:19) E tāua tele le faia faapea aemaise lava i taimi o puapuga. Na oo le tele o tofotofoga iā Paulo, ae na avatu e Ieova iā te ia le malosi e tumau ai. E ala i uso talitonu na saunia ai e le Atua le tele o faalaeiauga mo Paulo. O se faaa’oa’oga, ina ua auina atu e Paulo ona alofaaga i sui o le faapotopotoga i Kolose, na ia faapea atu: “O i latou fo’i nei na avea ma fesoasoani e faamalosiau iā te a’u.” (Kolo. 4:10, 11) O lo latou alolofa iā Paulo, na uua’ia ai i latou e faamāfanafana ma faamalosia o

\* Ua suia nisi igoa.

E mafai ona tatou tumau  
e ala i le iloiloina o le auala  
na tumau ai isi



ia i taimi o ona puapuaga. Atonu sa e mauaina fo’i se faalaeiauga ma le lagolagosua mai sui o lau faapotopotoga.

### LAGOLAGOSUA MAI I TOEAINA

O toeaina, o se isi vala ua saunia mai ai e le Atua le lagolagosua i faapotopotoga Kerisiano. O nei tane ta’umatuaina faaleagaga e pei o “lafitaga mai i le matagi ma se mea e malu ai mai i timuga mamafa, e pei o vaitafe i atunuu e leai ni vai, e pei fo’i o le paolo o le papa tele i le laueleele nau-mati.” (Isa. 32:2) Ma’eu se faamautinoaga e faafouina ai! Po o e faaogaina lenei sauniuniga alofa? O le faalaeiau ma le lagolagosua a toeaina e fesoasoani iā te oe e tumau ai.

O toeaina, e lē o i latou o ni fai vavega. O i latou o tagata e lē lelei atoatoa, ‘e iai vaivaiga e pei lava o i tatou.’ (Gal. 14:15) E ui i lea, e matuā telē le aogā o a latou faatoga e faia mo i tatou. (Iako. 5:14, 15) Na faapea mai se uso i Italia, o lē sa onosaia mo le tele o tausaga se ma’i tugā e faaleagaina ai musele o le tino: “O le alofa faapelepele o uso faatasi ai ma lo latou asiasi mai, na fesoasoani iā te a’u e tumau ai.” Po o aogā iā te oe le sauniuniga alofa a leova o toeaina?

### TAUSIA PEA SE FAASOLOGA FAALEAGAGA

E iai isi mea e mafai ona tatou faia ina ia tumau ai, e pei o le tausia o se faasologa faaleagaga. Se’i o tatou iloiloina le faa’oa’oga a Ioane e 39 tausaga, o lē na maua i le kanesa. Ua ia faapea mai: “Na ou manatu pe aiseā ua ou maua ai i lenei ma’i tugā ae e le’i taitai lo’u olaga.” O le taimi lenā faa-

to’ā tolu tausaga o lona atalii. Ua faapea mai Ioane: “O lona uiga, e lē gata i le vaaia e la’u avā o la ma tama la’itiiti, ae e tatau fo’i ona ia tausia a’u ma fesoasoani i taimi ou te alu ai e vaai le foma’i.” Na lagona e Ioane le matuā vaivai ma le faafau-fau ona o togafitiga o lona kanesa. Ae e le’i pau ai lenā. Na ma’i tigaina le tamā o Ioane ma mana’omia le tausiga a le aiga.

Na faapefea ona faafetaia’ia e Ioane ma lona aiga lenei tulaga faigatā? Ua ia faapea mai: “E ui i lo’u vaivai ae na ou faamautinoa o loo tausisi lo matou aiga i se faasologa lelei faaleagaga. E matou te auai i sauniga uma, faia so matou sao i le faiva i vaiaso ta’itasi, ma faia e lē aunoa la matou tapua’iga a le aiga e ui lava i faigatā.” Na iloa e Ioane, o le ki e tumau ai i so o se lu’i, o le tausia lea o lona itu faaleagaga. Pe e iai sana fautuaga mo i latou o feagai ma tulaga faigatā? Ua ia faapea mai: “E matuā faate’ia i tatou i le taimi muamua ona o popolega, peita’i a o faagasolo taimi e mafai ona suia na faalogona i le alofa ma le mana o leova. E mafai ona faamalosiā oe e leova e pei ona ia faia iā te a’u.”

E mautinoa o le lagolagosua a leova e mafai ai ona tatou tumau i tofotofoga faigatā, po o tulaga e tatou te fesaga’ia i le taimi lenei po o le luma-na’i. Se’i o tatou tatalo ma faalagolago iā leova, atia’e se faauōga māfana ma i latou i le faapotopotoga, talia le fesoasoani a toeaina Kerisiano, ma tausisi i se faasologa faaleagaga. O le faia faapea ua tatou faatatauina ai upu a Paulo: “E tatau ona outou tumau.”

## Pe na e faitauina māe'ae'a lomiga fou o *Le Olomatamata*? Se'i vaai pe mafai ona e taliina fesili o loo mulimuli mai:

### Pe e tatau ona tatou tatalo iā Iesu Keriso?

E leai. Na a'oa'oina i tatou e Iesu e tatalo iā Ieova, ma sa ia faataatia se faaa'oa'oga e ala i le tatalo i lona Tamā. (Mata. 6:6-9; Ioa. 11:41; 16:23) Na tatalo fo'i ona ulua'i soo i le Atua ae lē o Iesu. (Gal. 4:24, 30; Kolo. 1:3) —1/1, itulau e 14.

### O le ā e tatou te faia i tausaga uma e sauniuni ai mo le faamanatuina o le maliu o Iesu?

O se tasi o mea e mafai ona tatou faia, o le mulimuli lea i le faasologa o le faitauga Tusi Paia e fesoota'i atu i lona maliu. E mafai fo'i ona tatou faia ni tau-mafaiga e faatele ai so tatou sao i le faiva i le vaitaimi o le Faamanatuga. Ia tatalo ma manatunatu i lo tatou faamoemoe mai i le Atua.—1/15, itulau e 14-16.

### O le ā na tupu i pagota Aikupito e to'alua ia na faamatala atu a la miti iā Iosefa?

Na faamatala atu e Iosefa i le tautū uaina a Farao o le a toe faafo'isia o ia i lona tulaga. Ae o le uiga o le miti a le faifalaoa, o le a fasiotia o ia e Farao ma faatautau i le laau. Na sa'o le faamatalaina o miti. (Kene. 40:1-22)—2/1, itulau e 12-14.

### O le ā le meaalofo na maua e uso lapani na faate'ia ai i latou?

Na latou mauaina se tama'itusi o loo iai le tusi a Mataio mai i le *Faaliliuga a le Lalolagi Fou*. Ua ofo atu i le faiva ma ua taliaina e le to'atele o ē e lē masani i le Tusi Paia.—2/15, itulau e 3.

### O ā tulaga sa iai i le ulua'i senituri na fesoasoani i le folafolaina atu o le tala lelei?

O le tulaga lelei o le *Pax Romana* po o le lē tele o ni fetau-a'iga. Na failmalaga soo i auala lelei. Sa taatele le faaaogāina o le gagana Eleni, na faafaigofie ai le tala'iga, lea na oo atu i tagata Iutaia o ē na salalau solo i le emepaea. Sa mafai ona faaaogā e soo le tulafono a Roma e pui-puia ai le tala lelei.—2/15, itulau e 20-23.

### Aiseā e lē faamanatuina ai e Kerisiano le Eseta?

Na faatonu e Iesu ona soo ia faamanatu lona maliu, ae e lē o lona toetū. (Luka 22:19, 20) —3/1, itulau e 8.

### I tausaga talu ai nei, aiseā ua seāseā ai ona toe talanoaina i a tatou lomiga faaataga (type) ma le faataunuuga (antitype) o nisi mea o le Tusi Paia?

Ua faapea mai le Tusi Paia o nisi tagata ta'ito'atasi ua avea ma faaataga o se mea e sili atu. O se faata'ita'iga o lenei mea o loo

maua i le Kalatia 4:21-31. Peita'i e sili ai le aua ne'i taumafai e fafau a'e le faataunuuga o se mea. E mafai ona tatou a'oa'oina ni lesona mai i tagata ta'ito'atasi ma mea na tutupu o loo ta'ua i le Tusi Paia. (Roma 15:4)—3/15, itulau e 17-18.

### Aiseā ua avea ai se manusikulipi na tusia i pa'u o laau lea na toe maua mai i faaputuga lapisi i Aikupito anamua o se mea e fiafia ai?

I le senituri ua mavae atu, na maua se manusikulipi o loo aofia ai se vaega o le Evagelia a Ioane. O lenei manusikulipi atonu na tusia ina ua mavae ni nai faitau sefulu tausaga talu ona tusia e Ioane lana tusi, ma o mea o loo tusia ai ua faamautinoa ai iā i tatou le maufaatuatuaina o le Tusi Paia.—4/1, itulau e 10-11.

### Aiseā o se sauniuniga alofa ai le faate'aina o se tagata faimea sesē ae lē salamō?

Ua faailoa mai e le Tusi Paia le faatulagaga tāua o le faate'aina, lea e mafai ona maua ai aogā. (1 Kori. 5:11-13) E faamamaluina ai le suafa o le Atua, puipuia ai le mamā o le faapotopotoga, ma e toe sagatonu ai le mafau-fau o le tagata faimea sesē. —4/15, itulau e 29-30.



E mafai ona maua fua kopi o lenei mekasini ma isi lomiga mai le [www.jw.org/sm](http://www.jw.org/sm)



E mafai fo'i ona e faitau i le *Faaliliuga a le Lalolagi Fou* i nisi gagana i le Initaneti

Faaaogā le code pe taga'i i le [www.jw.org/sm](http://www.jw.org/sm)



W15.06/15-SM  
150210